



JORNAL

do

Parlamento Nacional

VI. LEGISLATURA

1.ª SESSÃO LEGISLATIVA (2023-2028)

REUNIÃO PLENÁRIA DE 10 DE JULHO DE 2023

Presidente: Ex.^{ma} Sr.^a Maria Fernanda Lay

Vice-Presidentes: Ex.^{mos} Srs. Maria Teresinha da Silva Viegas

Secretária: Ex.^{ma} Sr.^a

Vice-Secretárias: Ex.^{ma} Sr.^a Maria Teresa da Silva Gusmão

SUMÁRIO

Sr.^a Presidente loke sessão plenária iha tuku 9 liu minuto 23 dadeer.

Antes Ordem do Dia – Anúncio composição mesa Comissão Especializada Parlamentar sira nian.

Tuirmai, iha intervenção diversa sira, Sr. Deputado no Sr.^a Deputada sira aborda assunto sira hanesan: falta recibo iha loja sira; folin produto local iha Loja dos Agricultores ne'ebé caro; problema falta caderneta passaporte nian, tratamento saúde iha rai-li'ur no facilidade saúde sira; irregularidade iha recrutamento

ba funcionário contratado sira; concurso projeto nian ba empresário sira ne'ebé iha tendência ba grupismo; importância atu regista dados ba taxa mortalidade ne'ebé aas; atraso ba transferência fundo bolsa nian ba bolseiro sira; normalização ba mota sira hodi evita desastre natural, liu-liu inundação; necessidade ba recolha no lori fila ruin mártir sira-nian; possibilidade cancelamento ba projeto construção estrada nian balu; explicação ba função ministério balu nian ligado ho orgânica IX Governo Constitucional nian; crítica ba

qualidade membro Governo sira-nian; normalização ba estrada sira ne'ebé afetado husi mota no tau atenção população vítima desastre sira; presença técnico Governo nian atu anota preocupação Deputado sira-nian; gestão no consciencialização ba tratamento lixo sira; congratulação ba IX Governo Constitucional no apreciação ba serbisu Governo nian hodi hatán ba desastre natural; importância ba harii paragem autocarro nian hodi evita engarrafamento; urgência atu tau semáforos iha fatin ne'ebé iha circulação barak hussi veículo sira; hadi'a terminal sira no prepara terminal internacional ba autocarro sira; necessidade atu hetan explicação husi Autoridade Proteção Civil kona-ba gestão ba desastre natural sira; consideração ba funcionário contratado sira; atraso iha pagamento ba projeto comunitário sira; insegurança iha cidade Díli tanba caso assalto uza motorizada hodi hadau telemóvel; atraso ba pagamento bolsa mérito nian; falta ai-moruk iha hospital sira; apreciação ba visita husi Ministro dos Negócios Estrangeiros sira husi Japão no Austrália, no importância ba reforço diplomacia ho Austrália ba desenvolvimento exploração petrolífero nian; controlo ba folin sasán ne'ebé sa'e maka'as; Centro Logística Nacional ne'ebé seidak selu trabalhador sira; falta bee mos ba comunidade sira no negociante sira ne'ebé ocupa passeio sira hodi fa'an sasán. Ikusmai, Sr.^a Presidente Parlamento Nacional fó hanoin balu mós ba Deputado liga ba assunto sira ne'ebé Deputado sira levanta no

husu atu halo fiscalização hodi hodi relata Governo foun atubele resolve.

Ordem do Dia – Discussão no votação ba Deliberação do Parlamento Nacional n.º 5/VI/1.^a de 2023 – Aprova a Primeira Alteração à Deliberação do Parlamento Nacional n.º 3/2023, de 5 de julho, sobre a Constituição das Comissões Especializadas Permanentes, ne'ebé ikusmai aprovado ho unanimidade.

Sr. Deputado no Sr.^a Deputada sira-ne'ebé halo intervenção mak Lídia Norberta dos Santos Martins (FRETILIN), Natalino dos Santos (CNRT), Antoninho Bianco (FRETILIN), Leandro Lobato (CNRT), David Dias Ximenes «Mandati» (FRETILIN), Patrocínio Fernandes dos Reis no Cedelízia Faria dos Santos (CNRT), Alexandrino Afonso Nunes (PD), Adolfo Martins (PLP), Olinda Guterres (KHUNTO), Albino da Silva (CNRT), Marcos Soares Martins no Gabriel Soares (CNRT), António da Conceição «Kalohan» (PD), Firmínio Taequi no Veneranda E. M. Lemos Martins (CNRT), António Moniz Calau no Óscar Lima (FRETILIN), Domingos Augusto «Deker» (CNRT), Joaquim dos Santos «Boraluli» (FRETILIN), Duarte Nunes (CNRT) no Aniceto Longuinhos Guterres Lopes (FRETILIN).

Sr.^a Presidente taka sessão plenária ne'e iha tuku 11 liu minuto 59 dadeer.

Sr.^a **Presidente** (Maria Fernanda Lay): — Srs. Deputados, ha'u husu para ida-idak tuur iha nia fatin.

Horas hatudu tuku 9 liu minuto ruanulu resin tolu.

Mais uma vez ha'u agradece Ita-Boot sira-nia paciência. Tanba Comissão A seidauk fó nia lista naran Deputados ne'ebé atu tuur iha-ne'ebá, hodi nune'e orsida ita sei hahú lê husi Comissão B. Ne'ebe, husu atenção ba Comissão A, depois de encontro líderes das bancadas seidauk haruka lista naran Deputados iha Comissão A nian.

Hodi nune'e ha'u atu hato'o agenda n.º 6/VI/I - Reunião plenária de segunda-feira, 10 de julho de 2023. Abertura, Período de Antes da Ordem do Dia iha:

1. Anúncio da composição das mesas das comissões especializadas permanentes.
2. Intervenções diversas dos Srs. Deputados.

E, pelos vistos seidauk iha nem bancada ida atu halo declaração política.

E Período da Ordem do Dia, ita iha discussão e votação da Primeira Alteração à Deliberação n.º 3/2023, de 5 de julho, Constituição das Comissões Especializadas Permanentes.

Tanba tempo, ha'u fó imediatamente ba Sr.^a Secretária e Vice-Secretária atu lê anúncio da composição das mesas das comissões especializadas permanentes.

Hodi nune'e, Sr.^a Secretária, hahú husi Comissão B tanba Comissão A seidauk iha. Halo favor.

Sr.^a **Vice-Secretária da Mesa** (Maria Teresa da Silva Gusmão): — Obrigada ba Presidente Parlamento Nacional.

«Composição da Mesa da Comissão B: Presidente, Deputado Domingos Augusto «Deker»; Vice-Presidente, Deputado Luís Roberto da Silva; Secretária, Deputada Sancha Margarida Tilman.

Comissão C: Presidente, Deputada Cedelízia Faria dos Santos; Vice-Presidente, Deputado Francisco da Costa «Ikulay»; Secretária, Deputada Aliança da Conceição.

Comissão D: Presidente, Deputado Ricardo Baptista; Vice-Presidente, Deputado Manuel Henrique Noronha; Secretário, Deputado Saul Salvador H. J. Amaral.

Comissão E: Presidente, Deputado Marcos Xavier; Vice-Presidente, Deputado Óscar de Araújo; Secretária, Deputada Irene Gonzaga Sarmento.

Comissão F: Presidente, Deputada Maria Gorumali Barreto; Vice-Presidente, Deputado Luís Ximenes Caldeira; Secretário, Deputado Leandro Lobato.

Comissão G: Presidente, Deputado Armando dos Santos Lopes; Vice-Presidente, Deputado Gabriel Soares; Secretário, Deputado Mateus da Cruz de Carvalho».

Obrigada.

Sr.^a **Presidente**: — Muitíssimo obrigada, Sr.^a Secretária.

Tuirmai, intervenções diversas dos Srs. Deputados.

Iha ona inscrição iha-ne'e, Deputada Lídia Norberta. Halo favor.

Sr.^a **Lídia Norberta dos Santos Martins** (FRETILIN): — Obrigada, Sr.^a Presidente.

Bom dia ba Sr.^a Presidente, ba composição da Mesa, ba Srs. Deputados, ba maluk rona-na'in sira ho mília.

Iha dadeer kmanek ida-ne'e ha'u hakarak foti questão rua ne'ebé ha'u hanoin katak pertinente tebes.

Ita circula iha Díli laran, iha loja chinesa ou loja agricultura, quando ita bá hola sasán, recibo ne'e la iha. Por exemplo, iha loja agricultura, beibeik, ha'u cliente iha-ne'ebá ha'u bá hola, semana-semana quase, sasán iha-ne'ebá. Sasán di'ak, maibé ita bele dehan katak nia preço ne'e mós halo com que sasán barak mak dodok iha-ne'ebá. Então, se loja agricultura ne'e atu acomoda, recolha produção agricultor sira-nian hodi nune'e bele halo escoamento iha mercado, nia preço ne'e mos tem que ser atrativo. Ne'e primeiro.

Segundo, ida recibo ne'e, recibo ne'e problema boot. Iha-ne'ebá sei halo cálculo manual. Se ema cliente ida, consumidor ida, nia iha interesse, nia hakarak halo cálculo iha certeza, então nia husu mak ema foin regista manual. Então, ne'e problema boot ida ba ita.

Nune'e mós iha loja china, beibeik ona acontece. Ha'u rasik iha ha'u-nia experiência, primeiro ha'u bá haree sasán sira-ne'e ha'u halo cálculo iha ha'u-nia telemóvel, to'o iha caixa, caixa hateten dehan preço sa'e, ha'u dehan: «Lae! ha'u-nian hanesan ne'e», e acontece, ha'u halo beibeik ona dala rua ou dala tolu hanesan ne'e. Então, husi ida-ne'e ita haree katak parte competente, se bele karik, haree kona-ba ida-ne'e. Tanba ida-ne'e ita dehan katak mercado livre, buat hotu-hotu di'ak, mas ita, buat ki'ik ida-ne'e de'it ita la controla, ne'e halo nu'usá?

Questão ida terceiro, ko'alia kona-ba maluk sira-ne'ebé agora hasoru dificuldade, la bele halo passaporte, la bele sai ba li'ur. Tanba sira barak precisa atu bá halo tratamento de saúde iha li'ur, maibé ida-ne'e sai impedimento, e ita haree mós iha maluk barak ne'ebé moras, agora sofre coração, moras coração ne'e barak, ida-ne'e ne'e quando ohin halo atendimento tem que ohin duni, se ita budu ka ita dada, ne'e ita prejudica ema ne'e ita bele lakon cidadão ida ou ema di'ak ida-ne'ebé contribui. Ho nune'e mak ha'u hanoin katak Governo precisa haree ida-ne'e.

Maibé, ha'u atu ko'alia questão ida importante tebetebes. Iha Governo anterior iha ona assinatura contrato ida ho *iHEAL Medical Center* husi Malásia. Ha'u rasik mós bá iha Malásia acompanha família balun ne'ebé halo tratamento iha-ne'ebá, iha-ne'ebá halo tratamento ida que di'ak.

Então, precisa duni atu Governo atual, se bele karik, fó nafatin continuidade ba contrato ida-ne'e ou acordo ida-ne'e hodi nune'e bele colmata tiha ita-nia necessidades rai-laran bá halo tratamento ida iha rai-li'ur kona-ba coração nian tanba sira iha-ne'ebá mós disponível atu halo transferência de conhecimento mai iha ita-nia rai-laran.

Ne'ebe, ami hanoin, mak ida-ne'e de'it, la o'alia barak, ko'alia de'it mak kona-ba questão ida pertinente tebetebes ba ita.

Mak ne'e de'it, Sr.^a Presidente.

Obrigada.

Sr.^a **Presidente**: — Muiíssima obrigada, Sr.^a Deputada, mas as preocupações prevalecem.

Tuirmai, Sr. Deputado Natalino dos Santos.

Sr. **Natalino dos Santos** (CNRT): — Bom dia, Sr.^a Presidente Parlamento Nacional, Mesa Parlamento Nacional no colega distinto Deputado sira.

Iha dadeer kmanek ida-ne'e ha'u hakarak foti questão rua importante tebetebes, liuliu iha Oe-Cusse, Região Administrativa Oe-Cusse Ambeno. Assunto ne'e assunto ida que halo quase funcionário público iha Oe-Cusse sente lamentável tebes. Agora daudaun iha quase 2444 contratados ne'ebé halo recrutamento iha tempo de campanha e agora daudaun quase atu assina ona contrato ba contratado sira-ne'e e atu desloca ona ba iha fatin serviço. Preocupação mak ne'e: Oe-Cusse hanesan município ida, funcionário barak tebetebes e agora daudaun 2444, maibé la hatene sira atu ba serviço iha-ne'ebé. Nune'e mós, recrutamento ne'e iha tempo campanha, e recrutamento ne'e la tuir regras normais, la obedece ba lei Função Pública nian. Tanba ida-ne'e, ha'u, iha fim de semana iha-ne'ebá, iha funcionário barak, iha cidadão balun que lamenta tebetebes, sira husu atu foti questão ne'e iha-ne'e e atu husu ba Parlamento Nacional atubele ordena comissão ida para haree to'ok assuntos ne'e porque despesa boot ba Estado, liuliu orçamento ne'ebé aloca ba iha Oe-Cusse barak liu ba funcionário contratado, funcionários casuais. Ida-ne'e problema boot tebetebes, tanba ne'e ha'u hakarak bolu atenção ba IX Governo Constitucional atu haree filafali situação ida-ne'e.

Segundo, hakarak foti mós questão, liuliu *tenderização*, ne'ebé iha Oe-Cusse durante ne'e e sai preocupação ba empresário sira iha Oe-Cusse, katak iha *tender* ba projeto iha tempo de campanha to'ohin loron e agora daudaun *tender* nafatin e *tender* ne'e mós favorece ba grupo balun de'it. Tanba ne'e empresário sira iha Oe-Cusse husu para foti questão ida-ne'e, ho nune'e Parlamento Nacional, liuliu Comissão Infraestrutura, atu haree questão ne'e tanba problema ne'ebé iha Oe-Cusse durante ne'e sai preocupação ba empresário sira, liuliu iha processo *tenderização*. Tanba ne'e ha'u hakarak foti questão ne'e iha Parlamento Nacional atu haree assunto rua ne'ebé ha'u foti.

Ida-ne'e mak ha'u hakarak hato' o iha-ne'e e questão ne'e questão ida pertinente tebetebes atu toma em consideração.

Obrigado.

Sr.^a **Presidente**: — Obrigada, Sr. Deputado.

Tuirmai, Sr. Deputado Antoninho Bianco.

Sr. **Antoninho Bianco** (FRETILIN): — Bom dia ba Presidente, ba colega sira hotu no ba maluk sira-ne'ebé acompanha.

Ha'u hanoin, dadeer-saan ne'e ha'u hakarak husu de'it Governo foun ne'e bele buka dados loloos kona-ba gráfico durante ne'e, ita dehan gráfico kona-ba ema mate. Causa mate ne'e loloos saida? Ha'u hanoin, Governo agora tem que buka hatene tanba ita durante ne'e duun malu, duun malu, maibé tem que buka to'ok gráfico ba ema mate ne'ebé dala ruma loroloron, dala ruma fulan, ne'e causa loloos ne'e saida.

Tuirmai, ita tem que hatene tanba ita atu sosa ai-moruk karik ita tem que sosa la'ós *borongan*, maibé ita hatene katak sosa ai-moruk por causa buat ida moras barak acontece, ne'e mós gráfico ne'e bele acontece iha nível nacional acumulativo, maibé iha nível município ne'e mós hanesan. Por exemplo, karik moras iha RAEOA ne'e moras saida mak *dominan*, no iha posto sira-ne'e ne'e moras saida mak *dominan*. Cada posto ninia moras ketaketak karik, nune'e mós ba iha suco. Tanba ne'e, ha'u hanoin, lalika malae sira mak halo, maibé timoroan sira bele halo levantamento, para ita bele hatene causa moras barak loos iha Timor ne'e saida loos, e oinsá mak atu combate. Então, ha'u husu Presidente Parlamento bele encaminha preocupação ne'e - ha'u hanoin ita hotu nian - para ita bele identifica loloos Timor-Leste nia moras loloos ne'e, gráfico ne'ebé iha barak loos ne'e, saida mak causa ema mate ne'e. Ne'e bele deteta até to' o iha suco para bele dehan reforça instituição karik reforça iha parte ne'ebé, ho especialidade ida-ne'ebé, para to' o tempo ida keta Timor-Leste ema ta'uk atu mai tanba de'it iha moras, e oinsá mak ita bele combate. Tanba ita la bele combate moras, la bele combate sasán sira-ne'ebé hada'et, halo ema moras, investidor mós sei bele dehan la seguro katak atu bá, pois tratamento saúde hanesan ne'e, então bele mós fator determinante ida atu teri netik ema.

Ne'ebe, ha'u hanoin, ha'u-nia preocupação ha'u hein katak la bele halo kleur. Bele mós tinan ida ka la to' o tinan ida, bele tama mós antes de 120 dias ida be Governo hateten ne'e, Ministério Saúde bele hato' o katak ne'e mak trabalho de casa ida 120 dias nian. Para bele dehan ita atu halo buat balun que iha diferença, 120 dias ne'e mai karik ha'u husu to'ok iha parte ne'e bele fó ka lae: iha nível nacional mak ne'e, iha nível município nian mak ne'e, iha nível posto nian mak ne'e, iha nível suco mak ne'e. Tau mapa kona-ba ida-ne'e, ita bele deteta, então ita halo projeto karik ba combate atu ema la bele moras, combate moras ne'ebé acontece karik, ita iha ona recomendação.

Ne'ebe hirak-ne'e maka, ba ha'u, ohin ha'u bele hato'ó ba Sr.^a Presidente. Membro Governo ida be hetan tomada de posse mós la mai nafatin, ha'u haree kala besikoan hela, ne'ebe karik la mai ne'e tanbasá. Mas la buat ida, hein katak Presidente mesak fetó sira de'it iha leten ne'e, mane oan ne'e mós la iha, ne'ebe Mesa mós la completo tan, hein katak Ita-Boot sira completa iha leten ne'e bele fó-hatene sai, sira-ne'ebé la completa mós iha li'ur karik halo apontamento, e nune'e mós ba membro Governo ne'ebé la mai iha-ne'e ne'e, bele halo apontamento tanba ita la bele ko'alia de'it, maibé ami ko'alia, imi halo. Agora mak ne'e: ami ko'alia, imi halo! Se imi atu halo, imi tem que rona! Se imi la rona, imi la hakerek, imi la recomenda.

Ha'u hein katak iha 120 dias, buat simples ida ha'u hato'ó ne'e, bele mós iha buat ruma que hato'ó, la'ós mai ha'u, ba povo tomak, katak povo mós hakarak hatene katak ita duun malu ka ita buka solução ba oinsá mak combate moras e oinsá mak ema la bele moras. Então, fetó na'in-tolu bele representa sira-ne'ebé la mai, e bele hato'ó mós ba Governo atubele halo serbisu ne'e bá oin.

Obrigado barak.

Sr.^a **Presidente**: — Obrigado, Sr. Deputado.

Até parece que história ne'e repete. Prevaecem as coisas, Sr. Deputado, la'ós agora. Ida be ema mate ne'e uluk COVID-19 mós ita hakarak hatene, maibé infelizmente Ministério da Saúde la fó to'ó agora. Ne'ebe, 120 dias o Governo vai fazer milagre? Maibé la taka dalan ba comissão permanente atu fiscaliza, la'ós Mesa.

Segundo, horikalan ha'u-nia bei-oan bá duni hospital, ai-moruk la iha, ne'ebe, comissão iha ona serviço atu halo. Iha Díli laran de'it mós nune'e, *apalagi* iha municípios. Ne'ebe, atenção boot ba ita hotu e assunto ne'e, ha'u hanoin, arrasta desde uluk to'ó agora. Ne'ebé, mai ita hotu mãos à obra.

Tuirmai, Sr. Deputado Leandro.

Sr. **Leandro Lobato** (CNRT): — Obrigado e bom dia, Presidente, composição da Mesa, caros colegas Deputados. Bom dia dala ida tan.

Presidente, ha'u atu informa hela, iha momento ne'e, liga ho ita-nia oan sira-ne'ebé universitário, ne'ebé acede ba Fundo de Desenvolvimento do Capital Humano (FDCH). Sira lamenta tanba desde Governo anterior sira la hetan transferência ba sira-nia conta. Balu to'ó fulan sia no balu to'ó tinan. Iha tinan kotuk mós ha'u levanta ida-ne'e, tanba lamentação mai husi ita-nia oan sira.

Ha'u hein katak ho Governo foun bele anota lamentação sira-ne'e para depois atu buka dalan hodi bele fó resposta ba ita-nia oan sira. Tanba inan-aman sira-ne'e mós barak dependente ba fundo ida-ne'e, sira-nia kbiit la iha, tanba ida-ne'e mak sira hetan apoio husi fundo ida-ne'e, se ita la halo transferência, ne'e dificulta tebes ita-nia oan sira-nia estudos. Tanba ida-ne'e mak momento furak,

momento ne'ebé ita bele partilha informação sira-ne'e, atu nune'e Governo bele considera, anota, para depois bele halo atuação imediata hodi bele fó resposta ba ita-nia oan sira.

Segundo, aproveita mós atu informa ba Instituto de Gestão dos Equipamentos, liuliu Brigada Estrada Samba Sembilan, ha'u hanoin katak ita bele previne antes ita hasoru situação sira-ne'ebé liga ho clima ohin loron ita hasoru. Udan mós bele acontece iha tempo bailoro, bailoro mós naruk, mas ohin loron ne'e udan maka'as fó hela ameaça ba população sira iha parte Liquiçá nian, iha mercado Liquiçá, iha mós Jardim dos Heróis ba ita-nia herói sira-ne'ebé iha hela jardim ne'ebé estabelecido tiha ona. Ne'e investimento ida boot, se ita lakohi halo normalização ba mota sira, ne'e fó ameaça, mota atubele sobu Jardim dos Heróis ne'e. Tanba ne'e mak Governo bele hola atenção, identifica fatin risco sira, bele orienta brigada sira para bele normaliza mota, atu nune'e la bele fó impacto ka fó ameaça população sira-nia uma, liuliu Jardim dos Heróis Município Liquiçá ne'ebé estabelece ona, e haloot ona ita-nia herói lubuk ida, ne'ebé horas ne'e daudaun iha Jardim laran.

Tanba ne'e mak ha'u hanoin katak ha'u bele passa informação ida-ne'e liga ho situação udan ne'ebé agora fó hela ameaça ba Jardim dos Heróis, Escola Secundária Geral Liquiçá no mós uma população por volta de duzentos e tal casas iha-ne'ebá, tanba ne'e mak precisa duni tau atenção ida sério para depois previne do que ita hakfodak buat hotu-hotu estraga hotu.

Obrigado, Presidente.

Sr.^a **Presidente:** — Obrigado.

Tuirmai, Sr. David «Mandati».

Sr. **David Dias Ximenes «Mandati»** (FRETILIN): — Obrigado, Presidente, componentes da Mesa, distinta Deputada e Deputado sira.

Ha'u la mai fali ho buat foun, agora ha'u ko'alia fali ida-ne'e Ita-Boot sira hakfodak ou então hamnasa ha'u, mas pertinente tebes: Restos mortais dos nossos mártires. Ida-ne'e ha'u ko'alia kleur, ita sira be kleur iha-ne'e hatene, horibainhira kedas mak ha'u ko'alia kona-ba devolução dos restos mortais dos nossos mártires. Ohin loron ita fó di'ak malu, horisehik horibainrua de'it testemunho boot sira mai barak, mai assiste cerimónia tomada de posse do novo Governo. Ha'u haree, momento oportuno para ita hotu-hotu preocupa ho sira.

Horisehik horibainrua ha'u haree iha ona resolução ida, mas resolução ne'e sei iha leten ka iha tiha ne'ebé, ita la hatene, ninia continuidade ita la hatene tiha ona. Ne'e duni ha'u mai reitera fali de'it, porque ida-ne'e sei chama atenção ba ita, Deputado sira, iha-ne'e, nu'udar representantes do povo, ao mesmo tempo nu'udar representante daqueles que pereceram e deram a vida para hoje podermos estar nesta bonança de liberdade.

Tan saida mak mak ha'u exige, Presidente? Horikalan ha'u assiste discussão Guiné Papua nian, Papua Ocidente ninian, os que estão a lutar pela independência de Papua, sira ko'alia kona-ba buat ida passado nian, oinsá mak ohin loron Papua sei nafatin de'it em questão. Maibé General Ponto dehan katak: «O, ne'e imi husu ba sira-ne'ebé mate tiha ona ne'e, porque ida-ne'e ami la hatene».

Ha'u ta'uk quando ita-nian mós hanesan. Ita dada, dada, ita la fó importância, chega uma determinada altura em que ita husu fali bá, sira mós sei bele responde mai ita: «Ida-ne'e ami la hatene porque sira seluk mate tiha ona».

Não é tentar politizar os restos mortais dos nossos mártires, maibé uma atitude de respeito. Ita, quase que em todas as cerimónias, hamriik fó um minuto de silêncio dedicado aos nossos mártires, maibé depois disso passa, passa apenas a ser um hábito. Ida-ne'e ladún di'ak! Mai ita hamutuk, hanesan ohin Presidente convida, de mãos dadas vamo-nos preocupar por eles também.

Segundo, ohin ha'u-nia maluk distinto Deputado Bianco mós ko'alia ona kona-ba saúde, «tan saida mak ema mate». Ha'u uluk iha-ne'e mós ha'u husu, tan ita quando haruka ema bá li'ur halo tratamento, ninia despesa ne'e duplicada, até triplicada tan.

Ha'u uluk iha-ne'e husu, karik bele buat ida material ne'ebé ita seidauk iha, ita tenta sosa tiha hotu, e depois recurso ne'ebé seidauk bele serviço ho material sira-ne'e, ita contrata por cinco anos, e dentro destes cinco anos ita haruka ita-nia especialista sira bá escola, e sira seluk iha-ne'e bele serviço hamutuk kedas ho técnico contratado sira-ne'e, depois de cinco anos estaremos à vontade. Custa um bocado, como é claro nos princípios tudo custa, mas depois de um certo tempo, quando ninia resultado iha ona, parece que as coisas podem ser mais fáceis, do que to'o ohin loron ita haruka ema bá li'ur, agora não podem ir para fora, estão com dificuldades por causa buat ida passaporte ne'e. Alguns já tem problemas. Ne'e duni, ha'u hanoin, ita um bocado pragmático bá, oinsá mak ita bele resolve ida-ne'e.

Ha'u-nia hanoin mak ne'e, e depois ita hotu-hotu hanoin hamutuk saida mak ita bele halo, porque saúde ne'e principal tebes ho mós ita-nia resto mortal sira-ne'e.

Muito obrigado, Sr.^a Presidente.

Sr.^a **Presidente**: — Obrigado.

Tuirmai, Sr.^a Deputada Maria Angelina Sarmiento.

Sr.^a **Maria Angelina Lopes Sarmiento** (PLP): — Muito obrigada, Sr.^a Presidente, bom dia.

E bom dia mós ba membros da Mesa, distintas Deputadas e distintos Deputados no mós povo doben Timor-Leste.

Ha'u hakarak ható'o preocupação ligado ho declaração husi Vice-Ministro das Infraestruturas, ne'ebé publica iha mídia katak Sr. Vice-Ministro sei hapára ou cancela contratos ba estrada sira husi Laga-Baguia no Uaiuaka-Quelicai.

Ida-ne'e lamentável tebetebes tanba processo atu to'o iha *tenderização* no processo ida ne'ebé companhia hahú ona ne'e processo ida que naruk, liu husi estudo de viabilidade, e *tenderização* ne'ebé liu husi dalan, companhia sira compete e sira preenche requisitos mak sira tama iha critério atubele halo construção ka obra ida-ne'e. Mas, bainhira membro Governo ida-ne'e toma posse, primeira declaração era para cancelar projeto ida-ne'e. Ida-ne'e ami lamenta tebes, tanba ne'e la'ós processo ida que baibain ita iha hábito balun que fó de'it, fahe de'it, mas la'o tuir processo.

Ida-ne'e iha V Legislatura mós Deputado sira exige tebetebes atu estrada bá posto rua ne'e tem que halo, tem que koko book tanba povo lamenta tebetebes tinan barak nia laran ho sira-nia estrada ne'ebé condição péssima, sira la bele iha acesso bá mercado, la bele iha asesu ba movimento, buat sira-ne'e hotu.

Ligado ho ida-ne'e, atu questiona mós tanba iha Orgânica do IX Constitucional, Ministério ne'e nia título Ministério das Obras Públicas, maibé Vice-Ministro Vice-Ministro Infraestruturas. Ida-ne'e mak halo ami confusão. Infraestruturas ne'e boot tebetebes, nia inclui portos, aeroportos, transporte, transporte rodoviária, buat sira-ne'e hotu, mas título ba Ministro limite tiha, título ba Vice-Ministro nakloke liu fali. Então ida-ne'e mak ami precisa Governo halo explicação, tanba saida mak Governo nia orgânica ida IX Governo ne'e iha Ministério ida ninia título diferente loos.

Ikusliu, ha'u hakarak ható'o declaração iha-ne'e ligado ho declaração ida-ne'ebé foin daudaun, recentemente, Sr. Presidente da República ható'o bá mídia, ne'ebé nia rasik questiona kona-ba membro Governo sira la apresenta CV (*Curriculum Vitae*), no Primeiro-Ministro nomeia ka hili ho taka matan de'it, nia ko'alia iha lian inglês dehan: «*Prime Minister choose blindly*». Di'ak, Sr. Presidente da República halo balanço ida que di'ak hodi critica Governo, katak Governo ida-ne'e boot, maibé ema qualificado uitoan liu.

Ne'e desafio ida tanba Presidente da República mós tau em questão kona-ba desafio geração foun sira-ne'ebé sei sai ukun-na'in ne'e iha duni integridade ka lae, qualificado ka lae, sira sei la iha tentação atu halo corrupção ka lae. Ida-ne'e buat ida que di'ak tebetebes. Maibé, saida mak Presidente da República questiona ne'e, ita ko'alia karik dehan «*Kasihlan engkau terlambat*», tanba iha Constituição RDTL, artigo 106.º ne'e fó mós competência ba Presidente da República atu nomeia restantes membros do Governo liuhusi proposta do Primeiro-Ministro. Ne'ebe, lamentável tebes Sua Excelência nia declaração ida-ne'e. Maibé, declaração ida que di'ak atu soe hela ba ita hotu atu haree no tetu, tanba ida-ne'e sai trabalho de casa atu, haree ba futuro, seleciona ema ne'ebé atu sai ukun-na'in iha Nação ida-ne'e.

Obrigada, Sr.^a Presidente.

Sr.^a **Presidente**: — Ha'u hanoin, preocupação do Presidente da República ne'e desafia ita, nia la'ós hatún ita, tanba ita exige Governo tem que iha competência. Ne'ebe, husik ba ita-nia Na'i-Ulun sira critica, ita mak tem que sente ha'u bele ka lae. Ida-ne'e. Tanba ha'u rasik mós, crítica ha'u simu, possivelmente iha sasán balun ha'u la hatene halo ha'u tem que apreende, e ao longo da vida ita sei apreende nafatin to'o ferik ho katuas *tanpa* limite de idade.

Ne'ebe, Sr.^a Deputada Angelina, ha'u simu crítica sira-ne'e, tanba ha'u lembra iha Deputados balu iha V Legislatura dehan contratados la precisa hasai, ne'ebe ita lalika alérgico. *Statement* ne'e iha Plenária ida-ne'e. Ne'ebe, ha'u hanoin, ita-nia memória sei fresca, mai ita hotu haree parte positivo, labele negativo. Ne'ebe, ita labele alérgico ba críticas, «*Makin tinggi ranting, makin digoyang angin*. Ne'e mak, ha'u hanoin, mai ita hotu haree parte positivo. Tanba lian haat que ita bele usa, usa *bahasa*, tanba ita-nia sociedade talvez mós compreende di'ak liu. Ne'ebe, ita labele alérgico e *go ahead!*

Tuirmai, Sr. Deputado Patrocínio.

Sr. **Patrocínio Fernandes dos Reis** (CNRT): — Obrigado, Sr.^a Presidente do Parlamento Nacional ho nia composição da Mesa, Sr.^a e Sr. distinto e distinta Deputado sira, público tomak, bom dia.

Ha'u hanoin, preocupação sira hato'o husi Sr. Deputado sira-ne'e pertinente, liuliu preocupação sira-ne'ebé relaciona ho desafios, matérias boot ne'ebé sai nu'udar matéria exame 120 dias IX Governo Constitucional nian. Matéria ne'e todan duni tanba matéria ne'e acumulado kala tinan lima ka tinan neen nia laran, mak sai matéria ne'ebé todan duni ba Governo ida-ne'e atu halo, mas ha'u fiar katak Governo comprometido atu halo, cumpre nia compromisso sira. Maibé ita hotu tem que hatene katak Governo ida-ne'e seidauk iha pleno poder atubele fó respostas ba preocupação sira-ne'ebé ohin ita hotu foti iha-ne'e. Programa do Governo seidauk mai to'o iha-ne'e para ita hotu bele hatene katak ação saida mak precisa Governo ne'e atu halo iha tempo curto nian no médio nian atu fó respostas ba preocupação sira-ne'e hotu. Ne'ebe, iha-ne'e ha'u hanoin katak importante duni preocupação sira-ne'e, maibé ita paciência uitoan, hein uitoan, atubele haree saida mak Governo ne'e atu halo.

Tuirmai, kona-ba crítica sira husi Presidente da República, ha'u hanoin katak ne'e parte ida para encoraja di'ak liután jovem timoroan sira-ne'ebé ho aten-barani hola parte iha membro do Governo atu simu desafios hotu, oinsá mak atu serbí ba povo ne'e ho Nação ida-ne'e.

Kona-ba contrato sira ba infraestruturas nian ka estradas, buat sira-ne'e hotu, ita hein uitoan para Governo to'o mai política saida mak Governo precisa atu haree hodi tau ação para fó respostas ba buat sira-ne'e hotu.

Ha'u, dadeer ida-ne'e, hakarak atu fó-hanoin de'it katak mesmo Governo seidauk iha pleno poder atu halo ação barak, maibé tanba ita-nia máquina do Estado funciona hela, diretor-geral sira iha

hela hotu, ha'u hanoin, liuliu mak tem que acelera uitoan halo normalização ba estrada sira-ne'ebé afeta husi inundaçãu, taka dalan hotu-hotu, liuliu iha parte sul ne'ebá. La'ós de'it bá halo açãu ba ida-ne'e, maibé tau mós atençaõ ba ita-nia populaçãu sira-ne'ebé afetado husi inundaçãu. Ne'e duni husu atubele canaliza informaçãu ne'e ba ministériu sira relevante, se bele, hola açãu ruma imediata para depois fó netik assistênciã ruma ba ita-nia populaçãu sira-ne'ebé afetado husi inundaçãu ne'ebé foin mak liu. Graças a Deus ita hanoin katak loron rua-tolu liubá udan começa menos, mas ita hein katak ita-nia máquina do Estado funciona hela, direto-geral sira, diretor nacional sira bele iha hanoin ruma atu oinsá mak halo açãu ruma imediata ba fó daudauk respostas provisórias ba preocupaçãu povo nian, ne'ebé afetado husi problema inundaçãu nian.

Ha'u hanoin, ida-ne'e de'it mak precisa atu hato'o. Dala ida tan hanoin katak buat hotu ne'ebé ita hotu preocupa ne'e preocupaçãu povo tomak nian e preocupaçãu sira-ne'e duni mak sai matéria de campanha eleitoral ba partido sira-ne'ebé agora atu bá assume knaar nu'udar governantes. Ha'u hanoin katak sei lori mai política sira-ne'ebé ita hotu hanoin pertinente atu fó respostas ba preocupaçãu sira-ne'e.

Obrigado barak.

Sr.^a **Presidente**: — Tuirmai, Sr.^a Deputada Cedelízia.

Sr.^a **Cedelízia Faria dos Santos** (CNRT): — Muito obrigada, Sr.^a Presidente.

Ha'u-nia bom dia no respeito ba Ita-Boot, composiçãu da Mesa, distinto Deputado sira, ita-nia maluk rona-na'in sira, karik sintoniza hela Rádio Parlamento nian, mídia sira no audiênciã sira tomak. Dala ida tan ha'u-nia bom dia ba Ita-Boot sira.

Uluknanain ha'u hakarak fó-hanoin de'it ba Mesa, tanba ita iha Período de Antes da Ordem do Dia, ne'ebe Deputado sira sei fó sira-nia preocupaçãu. Karik bele, ita hatene katak loos duni membros dos Governo sira iha preocupaçãu barabarak, pelo menos haruka técnico ruma mai tuur iha-ne'e para ita ko'alia karik sira bele anota. Karik iha duni ne'e, então anota, tanba ohin Presidente la informa, então ami mós hanoin hela katak será que Governo haruka duni nia ema ruma mai tuur hela iha-ne'e. Se Governo haruka, favor ida iha entrada Presidente bele informa hela para Deputado sira lalika foti beibeik questãu dehan katak Governo foun no la iha ema ida mak mai participa iha Plenária ne'e.

Ida-ne'e hanesan fó-hanoin de'it, obrigada barak.

Segundo, ha'u mós hakarak secunda saida mak ita-nia Deputado David «Mandati» ko'alia ona, kona-ba restos mortais. Wainhira ha'u mós seidauk tuur iha Plenária, iha li'ur de'it ha'u rona beibeik Sr. Deputado sempre foti questãu kona-ba ita-nia restos mortais. Ha'u hanoin, ne'e importante tebes, ita agora ukun an tiha ona ba mais do que 20 anos, maibé ita tem que tau mós importânciã ba ita-nia restos mortais, tanba iha família barak ita simu tiha ona condecoraçãu, maibé ita-nia restos mortais

ne'e ita la hatene iha-ne'ebé. Ita sente orgulho tanba ita simu ona condecoração ba ita-nia família sira-ne'ebé mate ona, ita tau iha uma, mas infelizmente ita la hatene sira-nia isin-mate sira-ne'e iha-ne'ebé. Então, Governo ida-ne'e, ha'u fiar ho liderança Maun Boot Xanana nian ne'ebé halo ligação di'ak ho Indonésia, bá oin iha tempo badak karik durante tinan lima ne'e ita bele hetan ona sira-nia restos mortais ne'e. Ha'u hanoin, ita agradece e ita orgulho, orgulho ba buat hotu, la'ós iha parte balun de'it.

Tuirmai, ha'u hatene Deputado barak foti beibeik questão kona-ba lixo, iha fim de semana ne'e ha'u mós la'ó, ha'u haree katak lixo ne'e demasiado duni iha Díli laran. Ita haree, liuliu iha sábado e domingo, karik tanba ita-nia pessoal sira-ne'ebé halo coleção ba lixo funcionário público, se ha'u la sala, então lixo ne'e iha sábado e domingo ita la'ó, ita haree iha loja boboot nia oin sira-ne'e. Ita tuun mai husi besik iha Audian, besik tan iha *apotik* ne'ebé ema bá halo consulta beibeik, maibé iha nia oin kedas loja boot sira-ne'e soe hela lixo bou aas liu iha-ne'ebá. Ita hatene katak lixo ne'e mós fó impacto ba ema nia saúde. Iha fatin ne'ebé ema bá halo consulta iha-ne'ebá, e depois lixo soe iha oin ne'ebá, então ha'u sente katak ida-ne'e ha'u preocupa tebes.

La'ós iha parte Audian ka parte Comoro de'it, maibé ita liu bá Cristo Rei ne'ebé hanesan fatin turístico, ne'ebé iha sábado, domingo ka loron bain leet ita-nia turista sira husi município ka husi estrangeiro tuur iha-ne'ebá, lixo sira-ne'e soe arbiru loos de'it. Tanba ne'e mak ha'u fó hanoin ba ita-nia Presidente Autoridade Município Díli nian atubele serviço hamutuk ho Ministério da Saúde hodi ita haree questão sira-ne'e.

Se bele karik ita mós halo sensibilização kona-ba lixo. Ita bele usa panfleto sira-ne'e hodi fahe ba ita-nia comunidade sira oinsá ita atu gere lixo ne'e. Se ita iha *banner* ruma ka produz *banner* ruma, tau iha tasi-ibun ne'ebá atu educa ita-nia ema sira oinsá atu tau lixo ne'e iha-nia fatin, selae ita sai, Díli laran ne'ebé hanesan capital husi República Democrática de Timor-Leste ida-ne'e sai loloos mak fatin ba lixo, la hatene loos ita atu ba soe iha-ne'ebé. Ha'u mós fó hanoin ba ita-nia autoridade competente sira atu halo regras ruma para loja boboot sira-ne'e sira mak iha responsabilidade lori sira-nia lixo rasik ba soe iha Tibar ne'ebá, labele ita-nia Governo tanba sira-ne'e ita dehan *profit*, sira halo lucro. Então, se halo lucro, sira mak iha responsabilidade direta ba sira-nia lixo, sira rasik mak transporta lori bá soe iha Tibar, labele ita-nia Governo ida-ne'e mak tem que haree ba buat hotu. Ha'u hanoin, ne'e ladún di'ak ida.

Ikusliu, ha'u hanoin, ohin mak ita hatene katak ita-nia Governo tomada de posse iha dia 1, significa iha sábado, no sira foin hala'ó loloos sira-nia serviço iha dia 3, significa ohin segunda-feira sira foin halo uma semana. Ha'u hanoin, cedo liu karik ita julga sira katak sira la halo ida-ne'e, halo ida-ne'ebá. Ha'u hanoin, ne'e cedo liu. E depois, ha'u hanoin katak Governo ida-ne'e sé mak ba tuir tomada de posse iha dia 1 foin liu daudauk, Ita-Boot sira bele haree katak membro Governo ida atual ne'e mesak jovem de'it, tanba ne'e ha'u hakarak fó parabéns dala ida tan ba IX Governo

Constitucional, ne'ebé promove ona, fó fiar ona ba ita-nia juventude barak hodi tuur hanesan membro do Governo. Dala ida tan ha'u-nia parabéns.

Mak ne'e de'it, Sr.^a Presidente.

Muito obrigada.

Sr.^a **Presidente**: — Obrigada, Sr.^a Deputada.

Ha'u atu hato'o de'it, Sr. Vice-Ministro Assuntos Parlamentares ohin realmente hato'o, ha'u mak haluha hato'o, ha'u husu desculpa, maibé técnico sira iha kotuk.

Ha'u hanoin, não é primeira vez, uluk mós ita-nia Ministro la mai, técnico iha-ne'e, ita hein katak sira bele responde ita. Ha'u lakohi julga tanba ha'u fiar katak técnico sira toma nota, e as comissões competentes, especializadas permanentes tem que toma nota para questiona o Governo. Ne'ebe ita serviço ambas as partes.

Sr. Deputado Alexandrino Nunes, halo favor.

Sr. **Alexandrino Afonso Nunes (PD)**: — Bom dia.

Mane oan ida be tuur iha leten ne'e agora iha kraik hela, nia usa nia direito hanesan Deputado atu hato'o nia liafuan.

Uluknanain atu agradece ba Na'i Maromak nia laran luak hodi haraik paz, domin, estabilidade ba povo no Nação ida-ne'e e Estado de direito democrático.

Bom dia ba Presidente Parlamento Nacional no composição Mesa, bom dia ba Presidente das bancadas, distintas e distintos Deputados, mídia, no povo doben iha território tomak iha rai-laran no mós iha diáspora. Tanba imi hotu nia confiança hodi deposita Ita-Boot sira-nia votos de confiança iha eleição parlamentar liubá, Partido Democrático hetan representação cadeira neen iha Uma-Fukun, Parlamento Nacional, iha VI Legislatura ida-ne'e.

Hanesan Bancada Governo, permite atan ha'u hato'o apreciação ba Primeiro-Ministro, Maun Boot Kay Rala Xanana Gusmão, ho elenco membro do Governo ne'ebé hamahan an iha IX Governo Constitucional, ne'ebé foin la'o iha loron sanulu nia laran. Ita hatene katak maski iha loron sanulu nia laran, maibé iha orientação claro hodi responde lailais no direta, liuliu ba famílias vítimas husi acontecimento desastres naturais ne'ebé ita la espera hodi estraga dalan, ponte, uma povo nian, sasán uma laran mós lakon, e lakon mós família balu.

Primeiro-Ministro responde ho lailais hodi orienta Ministério das Obras Públicas, MSSSI (Ministério da Solidariedade Social e Inclusão) no Secretário de Estado da Proteção Civil halo ona atuação rápida iha fase emergência hodi salva uluk no evacua sai husi fatin risco potencial bá fatin seluk.

Permite mai ha'u, liuhusi bancada Partido Democrático, hato'o mós votos de solidariedade ba famílias vítimas husi desastres naturais ne'ebé acontece iha semana kotuk, iha dia 3 to' o dia 4, lakon sira-nia sasán hotu-hotu no mós halo sira-nia laran la hakmatek. Atu hateten ho liafuan Indonésia nian karik «*sudah jatuh tertimpa tangga pula*», tanba terus maibé desastre ida-ne'ebé ita la espera hanehan tan sira, tanba ne'e mak Partido Democrático, ho neon haraik an, fó solidariedade tomak ba família hotu-hotu.

Tuirmai, questão balu ne'ebé ha'u atu coloca, hanesan mós seluk-seluk ne'ebé ohin hato'o ona, ita haree iha Díli laran ne'e, engarraamento, *kemacetan* ne'e makas tebetebes.

Ha'u atu foca liu uitoan ba iha buat ki'ikoan ida, kona-ba transporte público, liuliu microlete. Ita haree katak microlete sira-ne'e dala ruma la' o la tuir ordem, liuliu quando sira atu hatún ou tula passageiro sira, conforme sira-nia hakarak, dala ruma passa kedas iha curva *lampu merah* nian, sira pára tiha, e ida-ne'e mós bele contribui desastre ba ema seluk. Tanba ne'e mak ita hanoin to'ok, karik tem que iha *halte bus*, tanba baibain, hanesan nação sira seluk, iha fatin para atu tula ema, iha fatin mós para atu hatún ema, ne'ebe *kalau* la sala entre distância 100 metros em 100 metros ne'e iha *halte bus* para ema bele hein, bele hatún ema iha-ne'ebá, bele hasa'e ema iha-ne'ebá, nune'e para diminui uitoan engarraamento transporte público nian.

Ida fali, ha'u sugere, ita-nia *traffic light, lampu merah* ne'e, iha fatin balu ne'ebé importante tebetebes mós atu estabelece. Por exemplo, iha ponte Kuluhun, ita haree *matcet* tebetebes maibé to' o agora seidak iha. Ne'ebe, ha'u hanoin, ita haree took ida-ne'e.

Ida fali kona-ba terminal ...

Sr.^a **Presidente:** — Conclui Sr. Deputado.

Sr. **Alexandrino Afonso Nunes (PD):** —... Obrigado...

Sr.^a **Presidente:** — Hotu ona ou sei iha resto? Bele conclui.

... sim, iha terminal agora daudauk ita halo ona acordo ho Indonésia katak sira-nia Damri mós tama, agora ita-nia condição Terminal iha Tasi-Tolu ne'e ita problema uitoan, ne'ebé dala ruma ita mós moe. Ne'ebe, ha'u hanoin, oinsá para Terminal Tasi-Tolu ita bele haree, ou fatin ida-ne'ebé bele halo ona desenvolve para terminal ne'e sai terminal internacional.

Sr.^a **Presidente:** — Tuirmai, Sr. Deputado Adolfo Martins.

Sr. **Adolfo Martins** (PLP): — Obrigado, Sr.^a Presidente.

Bom dia ba Sr.^a Presidente, componente da Mesa, distinto Deputado sira, mória no maluk rona-na'in sira hotu.

Ha'u sugere atu bolu Autoridade Proteção Civil mai atu explica ba Deputado sira kona-ba sira-nia intervenção hodi responde ba vítima desastres naturais ne'ebé causa husi udan iha semana kotuk, nia processo responde ne'e to'o ona iha ne'ebé? No sira bele atualiza mós plano reserva para responde ka mitiga iha futuro tanba tuir serviço metodologia nian katak tinan ida-ne'e no tinan oin sei acontece bailoro naruk. Tanba iha bailoro naruk ne'e sei acontece ahi han rai, tanba ne'e mak husu mós ba iha Proteção Civil atubele iha ona plano prevenção ida-ne'ebé prevê ba iha futuro.

Segundo, atu hateten de'it, atu antecipa labele iha política burocracia Estado, nune'e sugere ba iha IX Governo atubele tau consciência hotu atu hanoin hapára ema ne'ebé serbisu iha ministério ne'ebé sira-nia contrato sei to'o iha dezembro 2023, tanba tuir lei n.º 6/ 2015, kona-ba Contrato a Termo Certo, ne'e assegura katak se hapára ema ruma, tem que avisa 15 dias antes. Nune'e ha'u sugere ba iha membro do Governo bele mai ho opção tanba bele hapára ema hirak ne'e maibé contrário ho política cria campo de trabalho e ha'u pessoal considera política burocracia Estado nian

Obrigado.

Sr.^a **Presidente**: — Obrigado, Sr. Deputado.

Tuirmai, Sr.^a Deputada Olinda Guterres.

Sr.^a **Olinda Guterres** (KHUNTO): — Bom dia ba Ita-Boot, Sr.^a Presidente do Parlamento Nacional, Vice-Presidentes Parlamento Nacional e Secretárias, colegas Deputados e Deputadas no maluk rona-na'in sira. Ha'u-nia bom dia ba imi hotu, liuliu ba sira-ne'ebé sintoniza hela husi rádio no televisão nia oin.

Sr.^a Presidente, ha'u secunda buat ida-ne'ebé ohin Sr. David Dias ko'alia e secunda mós Sr. daudaun ko'alia ne'e, Sr. Adolfo, maibé ha'u só aumenta tan uitoan tanba horibainrua ha'u mós simu informação, telefone, husi Baucau dehan katak funcionário sira iha-ne'ebá hasai tiha hotu ona e hatama fali seluk, iha Estatal. Ne'ebe, ba ha'u hanesan ne'e, Sr.^a Presidente, ha'u la preocupa, sé mak manán nia mak toma responsabilidade, atu sé de'it mak manán. Karik aban-bainrua tinan ruanulu ka tolunulu mai mak KHUNTO manán mós KHUNTO sei hasai ema sira-ne'ebé la'ós KHUNTO nian, tem que hatama KHUNTO nian, ne'ebe ami la preocupa. Maibé, naran hasai ema ne'e ho respeito, ida-ne'e mak ami hakarak. Ba ami, Partido KHUNTO, ha'u hasai ona ha'u-nia declaração liuhusi mória hotu-hotu katak partido rua ne'e, CNRT ho FRETILIN ne'e, Ita-Boot sira rua ne'e mak manán troca malu, ne'ebe Olinda mai tuur iha-ne'e ho partido KHUNTO nia naran, mai iha-ne'e atu sé de'it mak ukun mós ami fó apoio, naran katak haree povo nia moris.

Ita-nia jovem sira-ne'ebé la'ó bá rai rai sira-ne'e tanba serviço la iha ba sira, cria campo de trabalho fó ita-nia oan sira, ita-nia jovem sira! Ami, Partido KHUNTO, la preocupa. Dala ruma neineik-neineik mak FRETILIN ukun fali mós ami móvel, ami bá mai, ami la preocupa atu ba kaer ukun. Foin maka cadeira lima oan ne'e atu ba manán saida? Ne'ebé Ita-Boot na'in-rua ne'e, CNRT ho FRETILIN, ami fiar cem por cento na'in-rua mak sei troca malu. Agora daudauk CNRT mak *manán* ami fó suporta nafatin. Ami la husu cadeira ida, cadeira ami la precisa, hakarak mak haree ita-nia povo ne'ebé moris kbiit la iha. Ida-ne'e de'it mak KHUNTO nia hakarak.

Uluk ita iha AMP, la'ós dehan ami mak lakohi, PLP ho KHUNTO mak lakohi hamutuk ho CNRT, maibé CNRT mak soe hela ami, ne'ebe agora Olinda mai fali oposição. Maibé, oposição ida-ne'e orsida ita sei haree, oposição ida-ne'ebé bele fó apoio ba buat ne'ebé di'ak, tuir povo nia necessidade, ami sei vota. Ami la'ós atu bá vota para hadau cadeira ka tem que fó cadeira ida ka rua mai, ami la husu, ami la husu Ita-Boot sira nia cadeira! Maibé KHUNTO mai atu aprende, sé de'it mak kaer ukun ami tem que aprende ho nia. Karik FRETILIN mak kaer ukun ou CNRT mak kaer ukun, ami mai aprende, para aban-bainrua, karik ha'u mate ona, bele tinan tolunulu ka haatnulu mai fali karik KHUNTO mós bele sai Presidente hanesan mós Sr.^a Presidente. Ami iha-ne'e oposição maibé oposição ida ha'u-nian ne'e, ha'u-nia na'in-haat ne'e ha'u mak comanda, ha'u mak sira-nia comandante, ha'u maka sira na'in-haat nia general, ne'ebe Ita-Boot sira lalika preocupa, naran katak ukun ho loos no labele soe hela iha dalan klaran. Iha buat ida fó hatene mós ami, agora dehan hanesan ne'e, aban dehan hanesan ne'e! La'ós hanesan Ita-Boot sira uluk ne'ebé ha'u husu tun-sa'e fali iha li'ur ne'ebá Ita-Boot sira nonook de'it, de repente de'it cartão mean sa'e. Ida-ne'e ha'u lakohi. Fó-hatene ba malu para ami suporta! Ha'u hakarak suporta programa do Governo.

Sr.^a Presidente, kala hotu ba ida-ne'e ona, rohan ba ida-ne'e, tempo sei iha, maibé liafuan mak halo hotu tiha ona, tanba ohin rua-rua ne'e secunda hotu de'it ba sira-nian, ne'ebe ha'u la ko'alia barak ona.

Obrigada, Sr.^a Presidente.

Sr.^a **Presidente**: — Obrigada, Sr.^a Deputada, ba disciplina tempo. Ha'u agradece tebes. Inscrição ha'u taka. E, tuirmai, Sr. Deputado Abílio da Silva.

Sr. **Albino da Silva** (CNRT): — Obrigada, Sr.^a Presidente.

Ha'u-nia bom dia ba composição da Mesa, distintas e distintos Deputados, mídia no rona-na'in sira. Dala ida tan ha'u-nia bom dia.

Ha'u hanoin, ita iha-ne'e sei lembra, iha Plenária hirak ne'ebé ita liu ona, iha distinto Deputado ida que pronuncia atu ita ne'ebé novato sira-ne'e halo apresentação pessoal ida iha Plenária. Ha'u hanoin, ne'e buat ida di'ak tanba iha Indonésia nian dehan «*Tidak dikenal maka tidak disayang*»,

português nian dehan katak «*Não conhece não é amigo*». Portanto, parece-me que, se ha'u hetan licença ka autorização karik, ha'u Deputado primeiro ne'ebé apresenta ha'u-nia an iha Plenária ida-ne'e.

Ha'u-nia naran Albino da Silva. Ha'u mai husi Município Lautém nu'udar representante partido CNRT nian. Ha'u bele dehan ha'u novato iha VI Legislatura ida-ne'e, mas iha 2000 ha'u representa ona município Lautém iha Magna Casa ida-ne'e nu'udar membro Conselho Nacional iha Administração Transitória ONU ninian, ne'ebe fatin ida-ne'e la'ós foun ba ha'u tanba seidauk muda nia tamanho. Tais sira-ne'e mós iha momento ne'ebá tama iha proposta ami-nian, tau representação município ida-idak nia fatin. Saida mak seidauk? Ha'u ema kaben-na'in, oan na'in-haat, feen ida.

Ida-ne'e mak apresentação, ne'ebe ha'u halo iha Plenária ida-ne'e.

Agora, tuirmai, iha ha'u-nia contacto eleitoral, - ha'u la hatene Deputado seluseluk halo ona ka lae, mas ha'u halo iha semana liubá tanba preocupação barak ne'ebé mai husi população iha-ne'ebá tanba calamidade ne'ebé acontece - desastres naturais acontece iha fatin hotu-hotu, e ha'u consegue haree desastre sira-ne'e, ne'ebé acontece, ita hotu haree iha *media social Facebook* katak iha Posto de Administrativo Luro, escola Odufuru, alunos na'in-haat, feto rua no mane rua, corrente mota lori. Na'in-tolu, feto rua ho mane ida, mak consegue sai, mane ida até agora seidauk hetan nia isin-mate.

Ora bem, mate, mate ona. Atu hetan ka la hetan, ita sei hein. Maibé, ha'u husu Governo atu tau atenção ba situação ida hanesan ne'e tanba desastres naturais udan boot ne'e acontece tinan-tinan, ne'ebe buka hela solução ida para que quando udan boot mai, situação sira-ne'e labele repete.

Uluk ita-nia avò sira bele haree buat sira-ne'e sem hasai osan, nu'usá mak agora ita hotu-hotu hein projeto atu halo construção ponte ida? Ida-ne'e bainhira? E então, Governo ida-ne'e, la'ós Governo central de'it, maibé husi Governo local to'o mai central, hotu-hotu ne'e hanesan trabalho de casa ida para ita bele atende ita-nia população sira.

Tuirmai...

Sr.^a **Presidente**: — Sr. Deputado, bele conclui, por favor.

Sr. **Albino da Silva** (CNRT): — ... ponte ida iha estrada nacional Verukotchu, agora precisa normalização...

Sr.^a Presidente desliga Deputado Albino da Silva ninia microfone.

Sr.^a **Presidente**: — Sr. Deputado, ha'u husu desculpa tanba ohin ita foti tempo naruk hodi apresenta an, devia diretamente. Haree mós tempo Ita-Boot nian, está bem? Mas ha'u fó mais meio minuto para conclui de'it.

Sr. **Albino da Silva** (CNRT): — *Ok*, então ponte Verukotchu precisa normalização, porque selae ita-nia comunicação Díli ba Lospalos, Lospalos mai Díli kotu, labele! Iha Tutuala iha mós deslizamento de terra, agora estrada atu kotu, e ita hotu hatene katak Tutuala ne'e fatin turismo, agora frequentado tebetebes, ema bá mai e população iha-ne'ebá hein buat rahun ruma husi ema ne'ebé visita ba ne'ebá.

Obrigado, tenho dito.

Sr.^a **Presidente**: — Ha'u agradece, Senhores Deputados, haree Ita-Boot sira ida-idak nia tempo. Ohin ha'u carrega e taka microfone, mas ha'u evita. Para futuro ida-idak controla ninia intervenção.

Srs. Deputados, tanba perguntas por escrito também é admissível, ne'ebe se assuntos urgentes, ita bele halo por escrito imediatamente.

Tuirmai, Sr. Deputado António Verdial.

Sr. **António Verdial de Sousa** (KHUNTO): — Muito obrigado, Sr.^a Presidente.

Bom dia, Sr.^a Presidente, componente da Mesa, distintas no distintos Deputados aqui nesta Casa Magna.

Sr.^a Presidente, queria dizer que não direi nada que não precisa ser dito nesta Casa da Democracia, ha'u sei la ko'alia buat ne'ebé la precisa ko'alia iha Uma Democracia ida-ne'e.

Tuirmai, atan ha'u haklaken, secunda distinta Deputada Doutora Angelina Sarmento kona-ba estrada Baucau, especialmente destinação ba Quelicai, ho naran ida ha'u quando rona sempre fó ksolok iha ha'u fuan, mak Laisorulai.

Haree hikas ba IV Legislatura, bainhira ha'u tama mai iha Uma Democracia ida-ne'e, ha'u rona beibeik ha'u-nia Maun Boot «Mandati» ko'alia, ko'alia no ko'alia no ha'u mós tatoli, secunda, secunda, secunda.

Iha V Legislatura ha'u hakarak hatene situação no condição real iha terreno, nune'e ha'u lidera Comissão G hodi hakat ba to'o iha Matebian hun. Iha-ne'ebá ha'u haree estrada ne'e precisa tebes duni atu Governo tau-matan. Infelizmente obra ne'e temporariamente la'o hela, maibé hanesan Deputado, ha'u atu agradece ba Primeiro-Ministro VIII Governo Constitucional ne'ebé tau ona nia presença em marcha no processo ne'e la'o hela.

Hanesan Deputado iha Uma Democracia ida-ne'e, ha'u sente laran ladún haksolok bainhira ha'u rona ita-nia membro Governo ida hatete fali atu cancela estrada ne'e. Por amor de Deus, por amor de Deus, *jadilah pemimpin*, sai *pemimpin* ida, ne'ebé atu sustentabiliza, atu hatutan serbisu ne'ebé VIII Governo halo tiha ona. Karik iha naksalak ruma iha *internal* liga ba administração, favor ida

resolve internamente, não podia chamar atenção e diria, hato'o lian dehan «Tem que, tem que hapára!».

Favor boot ida, ha'u husu ba IX Governo Constitucional, no ha'u fiar katak ita-nia Maun Boot, Comandante em Chefe das FALINTIL, iha laran no fuan ida-ne'ebé domin ba rai ida-ne'ebá tanba dalan hirak-ne'e mak uluk ita-nia FALINTIL sira usa hodi halo luta, atu nune'e Timor-Leste alcança nia objetivo ukun-rasik an. Ne'ebe ha'u secunda saida mak Deputada ko'alia.

Segundo, Sr.^a Presidente, ha'u atu hatete katak iha sexta-feira ha'u bá rai Maliana, ha'u to'o iha-ne'ebá ha'u hakarak descansa, maibé kalan ita-nia maluk manorin-na'in sira hakat mai uma, sira tatoli mai ha'u – ha'u lakohi hatudu ba ponto importante, maibé ha'u, em geral - atu hatete ba Mesa no distinta e distinto Deputado sira, especialmente ba comissão G ne'ebé trata assunto educação favor toma atenção, entra em contacto com o Ministério da Educação para tratar consoante projetos comunitários ne'ebé construtor sira halo hotu ona, infelizmente pagamento seidauk fó, tanba ne'e mak chave de'it ba escola sira lakohi fó, ba educação municipal Município Bobonaro, especialmente ba Governo. Ne'ebe tau atenção!

E tuirmai, ha'u husu mós ba Ministra Educação, ha'u secunda ba buat hotu ka *kebijakan-kebijakan yang akan diambil oleh Menteri Pendidikan*, favor boot ida, tau matan ba serbisu ne'ebé VIII Governo halo tiha ona, atu hatutan serbisu sira-ne'e! Labele bá e hasai fali *statement* dehan: «Ha'u tem que estuda, estuda, estuda lai!» *Nothing*, labele estuda, tau em marcha atende buat sira-ne'e ho di'ak tanba manorin-na'in sira-ne'ebé hanorin ho tinan naruk tiha ona, maibé sira hein, hein ba hein. Nune'e, favor boot ida, tau matan ba atu resolve situação ida-ne'e!

Tuirmai, ha'u atu hatete mós, fó alerta ida ba PNTL atu tau segurança, tanba agora daudaun iha Díli laran iha motorizada lubun ida mak halai tun halai sa'e, dala ruma iha inan-feton sira ka mane sira telefone hela, motorizada to'o mai hadau telefone hodi halai lakon tiha, e depois segurança la hatene ba tiha ne'ebé. E, até ha'u hatene no ha'u compreende katak iha Governo anterior hasai orçamento ida boot tebetebes hodi tau máquina fotografia ka, CCTV ka, hale'u Díli laran, maibé na realidade quando ema halai hanesan ne'e ita la tau atenção.

Ida-ne'e de'it, ha'u-nia intervenção, no muito obrigado, Sr.^a Presidente.

Sr.^a **Presidente**: — Obrigado.

Tuirmai, Sr. Deputado Marcos Martins.

Sr. **Marcos Soares Martins** (CNRT): — Obrigado ba oportunidade dahuluk.

Respeito ba Sua Excelência Parlamento Nacional e composição da Mesa, ba mós distinta e distinto Deputado sira hotu, ha'u-nia saudações harmonia ba ita hotu.

Permite mai ha'u, iha oportunidade dahuluk ida-ne'e, hato'o hela reclamação ou exigência husi estudante no inan aman sira-ne'ebé sira-nia oan hetan bolso mérito.

Sira hatete katak loke tiha ona conta bancária iha BNCTL (Banco Nacional de Comercio de Timor-Leste), e to'o agora Direção Finanças ka Diretor das Finanças da Educação seidauk transfere osan ida naran bolso mérito ba oan sira-nia conta bancária. Sira questiona katak dala ruma ba *antrian* iha banco, maibé to'o iha *kasir*, *kasir* dehan osan seidauk tama, ho nune'e oan sira fila ho insatisfação.

Recomendação: husu ba Sua Excelência Presidente Parlamento Nacional atu hato'o ba Excelência Ministra da Educação IX Governo Constitucional hodi halo confirmação ba Diretor Finanças Educação Governo VIII nian atu buka hatene osan ne'e transfere ona ka seidauk. Karik seidauk, tanbasa? Karik transfere ona, hira mak hetan ona? E karik iha falha iha sistema, fó-sai iha mídia atu nune'e sira bele hatene, hodi nune'e sira labele lakon tempo bá hein ka ba *antrian* iha banco.

Obrigado ba Sua Excelência Presidente Parlamento Nacional.

Sr.^a **Presidente**: — Obrigado.

Tuirmai, Sr. Deputado Gabriel Soares.

Sr. **Gabriel Soares** (CNRT): — Obrigado, Presidente.

Bom dia, Sr.^a Presidente, Mesa, colegas distintos e distintas Deputados, mídia sira.

Atu hahú, ha'u hakarak hatete hanesan ne'e: aprecia ho colega Deputado sira uluk ohin liubá halo intervenção.

Primeiro, tem que identifica mate. Sim, tem que identifica duni! Mate iha hospital, mate iha dalan-dalan, mate ba Covid, mate la'ós tanba Covid, tem que identifica hotu. Maibé, ha'u sente, ex-Ministra Saúde iha tiha ona dados, quando *hand over* ne'e nia kala entrega hotu buat sira-ne'e ba iha Ministra foun. Ha'u sente, sira iha.

Segundo, kona-ba ai-moruk, loos duni, importante! Governo tem que halo duni investigação ba iha SAMES (Serviços Autónomos de Medicamentos e Equipamentos de Saúde), tem que halo investigação! Osan tau ba tau, tau ba tau maibé ai-moruk la iha. Ha'u sente, colega sira iha-ne'e mós balu hatene, família, buat sira-ne'e, talvez ita bá consulta, ba passa receita mai doutor sira hatete hanesan ne'e: «Ai-moruk iha-ne'e la iha, maibé receita mak ne'e, imi ba hola ai-moruk iha clínica ida-ne'e, clínica ida-ne'ebá». Sira indica kedas. Experiência ida-ne'e acontece, ida-ne'e acontece! Ai-moruk paracetamol mós talvez la iha, maibé passa fali receita dehan: «Imi tem que ba hola fai ai-moruk iha clínica A ou B ou C». *Ada apa dibalik itu?* Tem que haree halo didi'ak sasán sira-ne'e, tanba ita serbí povo.

Ko'alia kona-ba estrada sira, sim, se ha'u-nia tilun mós ladún diuk, matan ladún delek karik, liubá loos duni, tama iha véspera de campanha, *peletakan batu pertama* ne'e barak loos. MOP (Ministério das Obras Públicas) ida liubá ne'e *peletakan mak batu pertama, batu kedua, batu ketiga*, maibé *alat berat* ida iha *peletakan batu pertama* ba estrada sira-ne'e la iha, kala ba rai hela de'it fatuk primeiro. Bá rai fatuk primeiro, rai netik ho máquina primeiro bá para dudu liu tiha sasán sira-ne'e. Ha'u bele hatete hela evidência, dalan tama ba Laclubar, tama ba Soibada *peletakan batu pertama* mós. Ne'ebe pronto, sasán sira-ne'e tem que haree halo didi'ak para ba oin ita-nia Estado ne'e ita halo dehan atu serbí ba povo ne'e serbí ho didi'ak.

Ko'alia kona-ba ohin ha'u-nia Presidente cessante ohin dehan, «Ministra hasai *estatement* dehan 'estuda, estuda, estuda'», sim, estuda para tem que haree sasán sira-ne'e halo didi'ak. Ida mak projeto comunitário ne'e duni, tanba aprova iha-ne'e ba halo escola, bá fali iha Liquiçá ne'ebá halo fali barragem. Ne'ebe tem que haree didi'ak sasán sira-ne'e, tau sasán tuir nia fatin loloos, tem que estuda, haree didi'ak duni ida-ne'e para tau sasán ne'e tuir nia fatin. Aprova iha-ne'e tau ba escola comunitária, bá iha Liquiçá halo fali barragem. Ha'u Gabriel foti assunto ne'e iha-ne'e, ne'ebe tem que haree sasán halo didi'ak para labele tama sala, lae ema nia lian dehan: «Se la haree didi'ak ne'e *Tasafoma (Tama sala foti mate)* hotu». Ne'ebe ida-ne'e merece duni atu haree sasán ne'e para hatuur sasán, aprova tau *item* ida-ne'e ba iha terreno tem que halo hanesan nune'e, la'ós mai iha-ne'e husu osan tau hanesan ne'e, ba iha kraik halo fali nune'e. Barak, Sr. Deputado, Escola bá Uma sira. Ita mak ne'e nafatin, ita hateke ba malu. Sasán sira-ne'e ita tem que haree halo didi'ak, para tau osan povo nian labele halo mal gastos. Husu osan tau ba A, ba terreno tem que tau no halo A!

Tuir fali, kona-ba ohin colega Deputada sira balun hatete, *Orgânica do Governo*, com calma, com jeito! Sei mai, tanba Governo mós agora sei hala'o hela nia knaar, prepara halo didi'ak para oinsá bele submete nia programa tinan lima nian mai.

Ha'u aprecia ho Sr. Presidente da República nia liafuan,, ida-ne'e mak temi dehan Aman ba Nação, Aman ba Povo. Quando haree oan iha uma laran, aman tem que fó hanoin, tem que hasé, tem que hanesan ne'e, hanesan ne'ebá tanba aman ne'e. Se aman ida mak haree hanesan ne'e mak la liga, ne'e la'ós aman. Ida-ne'e mak dehan Aman ba Nação e Aman ba Povo tanba nia hakarak nia uma-laran ne'e atu di'ak. Ditado português hatete, «quem avisa amigo é» e ha'u atu apreende ida-ne'e.

Ne'ebe, maluk sira, calma uitoan! Sr.^a Presidente Parlamento hatene lê, la kleur tan programa mai, ita aprova tiha lai mak ita tau sasán oan sira-ne'e iha ida-idak nia fatin.

E tuirfali, ha'u aprecia tebes ho Ministro das Obras Públicas. Mesmo foin tama, maibé iha ona plano oinsá atu verifica didi'ak kona-ba projeto sira-ne'ebé la'o e projeto oan sira-ne'ebé la'o daudaun iha véspera de campanha, atu haree didi'ak. Projeto ne'e la'o e halo ba povo, maibé ita tem que haree mós nia legalidade halo didi'ak para ita halo ba ne'e nia legal e povo usa ba hanesan modo ida karik han ba iha sabor, selae ita naran foti fó de'it, fó de'it, to'o ikus la selu.

Sr.^a **Presidente**: — Tempo, Sr. Deputado.

Sr. **Gabriel Soares** (CNRT): — Minuto ida tan.

Ikusliu, ha'u fó hanoin ba Ministério das Obras Públicas, liuliu direção IGE, mesmo iha terreno sira tama iha daudaun ona iha-ne'ebá, maibé ba costa sul, tanba horikalan ha'u foin fila husi Natarbora mai, husu atubele reforça nafatin. E, hatete ba Diretor IGE ou Presidente Empresa karik ka I.P. (Instituto Público) mak ne'e ka, haree bá tanba riin eletricidade mós monu barabarak no balu kle'uk tanba afeta husi udan boot e estrada balu mós aterro ona, maibé seidauk di'ak e husu atu reforça halo di'ak tanba ba costa sul ne'e nia cobre ba município rua ka tolu, próprio Manatuto, ba Manufahi e Viqueque.

Obrigado.

Sr.^a **Presidente**: — MUITÍSSIMO obrigada.

Sr.^a Deputada **Lídia** husu ponto de ordem, mas ha'u husu para fundamenta o que quer falar. Faz favor, um minuto.

Sr.^a **Lídia Norberta dos Santos Martins** (FRETILIN): — Obrigada, Sr.^a Presidente.

Ohin Sr. Deputado ko'alia kona-ba escola ida iha Liquiçá, foin daudauk iha notícia balu ne'ebé haree construção sira-ne'ebé Estado nian as vezes halo ...

Sr.^a **Presidente**: — Sr.^a Deputada, ha'u ko'a lai Ita-Boot, Ita-Boot responde ...

Sr.^a **Lídia Norberta dos Santos Martins** (FRETILIN): — Sim, ha'u atu responde ida-ne'e ...

Sr.^a **Presidente**: — Não! Mas nia ohin la temi Ita-Boot. Tanba nia mós ba haree iha terreno, nia bele foti iha-ne'e, é livre um Deputado para fazer isso.

Sr.^a **Lídia Norberta dos Santos Martins** (FRETILIN): — Sim.

Sr.^a **Presidente**: — A Sr.^a também foi reeleita.

Ha'u hanoin, como naran sá ona, secunda é normal, mas ita atu responde malu, ha'u hanoin la'ós Ita-Boot mak atu fó informação, pode, através de fiscalização. Ita responde malu la hotu tanba sei iha 1, 2, 3, 4 e 5 Deputados e ha'u espera katak ita último iha-ne'e.

Sr.^a Deputada, ha'u husu desculpa.

Sr.^a **Lídia Norberta dos Santos Martins** (FRETILIN): — Desculpa, ha'u la'ós discorda, lae!
Sr.^a Presidente seidauk fó tempo ha'u, ha'u seidauk termina halo nu'usá mak ita bele halo conclusão.

Sr.^a **Presidente**: — No! Mas Ita-Boot intervém, agora hotu-hotu halo ponto de ordem, ha'u taka.

Sr.^a **Lídia Norberta dos Santos Martins** (FRETILIN): — Antes pelo contrário, atu reforça para bele haree la'ós dehan saida ...

Sr.^a **Presidente**: — Sim, se reforça ita hatene, se la'ós ...

Sr.^a **Lídia Norberta dos Santos Martins** (FRETILIN): — ... dehan katak iha mudança ne'e, dehan governação ida-ne'e iha mudança ne'e mak ami intervém, ami la'ós iha intenção seluk. Ne'e ka Sr.^a Deputada Presidente? Maibé, se lakohi la iha buat ida, ha'u sei retira.

La hatene ida-ne'e mudança de processo, ha'u mós la hatene.

Obrigada.

Sr.^a **Presidente**: — Desculpa, não é mudança de processo.

Se assunto ne'e loos, *that's it*, Ita-Boot mai reforça tan, ohin intervém tiha ona ne'e.

Ne'ebe, ha'u husu ...

Sr.^a **Lídia Norberta dos Santos Martins** (FRETILIN): — Sr.^a Presidente, desculpa.

Sr.^a Presidente hamate microfone bainhira Sr.^a Deputada tenta atu ko'alia.

Sr.^a **Presidente**: — Ha'u husu para ponto de ordem barabarak iha-ne'e halo favor fó tempo ba 1, 2, 3, 4, 5 atu halo sira-nia intervenção. Está bem?

Tuirmai, Sr. Deputado António da Conceição.

Sr. **António da Conceição** «Kalohan» (PD): — Obrigado, Sr.^a Presidente.

Bom dia ba Sr.^a Presidente no Mesa no mós ba Sr.^a Deputada e Deputado sira hotu.

Ha'u hahú ha'u-nia intervenção hodi lori Bancada do Governo ninian fó apreciação ba visita da Ministra dos Negócios Estrangeiros da Austrália ninian no mós Ministro dos Negócios Estrangeiros Japão ninian ne'ebé halo visita mai Timor-Leste iha início da governação semana kotuk, ato diplomático ida-ne'ebé garante mós confiança e atu garante nafatin boas relações entre os países.

Especialmente ba Austrália, visita ida-ne'e marco importante ida ba Timor-Leste hodi nafatin hatudu bom relacionamento entre rai rua ninian no mós expressão de boa vontade ba os interesses nacionais de Timor-Leste ninian ligado ba *Greater Sunrise*.

Tanba ida-ne'e, ha'u, hanesan mós Deputado da Bancada do Governo, hakarak louva Governo Austrália ba ato diplomático ida-ne'e, ne'ebé sensível duni ba povo Timor-Leste nia direito, ne'ebé mós expressa husi Ministras dos Negócios Estrangeiros, ne'ebé dehan katak desenvolvimento do *Greater Sunrise* é necessário para o desenvolvimento sustentável de Timor-Leste como país vizinho da Austrália. Ne'e ato ida-ne'ebé fó ba ita, Deputado sira, atu hanoin hamutuk saida mak interesse nacional. E, visita ida-ne'e fó mós ba ita hotu iha Uma-Fukun ida-ne'e atu lori ita hotu ko'alia kona-ba o bem estar do povo.

A política ne'ebé ita halo, ita hotu-hotu halo ba objetivo ida-ne'ebé consta iha ita-nia Constituição da República, artigo 6.º Objetivos do Estado. Tanba ida-ne'e ha'u hahú ha'u-nia intervenção hodi fó mós apreciação ba Governo Austrália no mós ba Sr.^a Ministra dos Negócios Estrangeiros da Austrália ba nia ato diplomático ida-ne'e, Ministra Penny Wong.

Segundo, ha'u mós hakarak atu dehan katak Governo ida-ne'e hola nia responsabilidade ba mudança ne'ebé nia promete e, tanba ne'e precisa duni atu halo estudos cuidadosos ba programa ne'ebé atu apresenta.

Já quase uma semana Governo ne'e halo hela Conselho de Ministros iha tempo sira-ne'ebé mós mak ita iha hela uma, sábado e domingo sira halo serviço.

Ha'u iha convicção katak apresentação do programa sei mai duni atu reflete mudança ne'e rassik, maibé mós, ha'u hanoin, saida mak colega Deputado sira seluk foti, ne'e mós chamada de atenção para ba a Bancada do Governo atu haree tanba ita hotu ko'alia kona-ba interesse do povo e povo ninia moris.

Ha'u hakarak mós atu dehan ita exigente demais iha início da legislatura hodi hakarak atu haree Vice-Ministro ida ka Ministro ida ninia oin iha ita-nia oin hodi dehan katak rona Deputado sira-nia lian. Mas, ita mós haluhan katak Governo ne'ebé de'it, nia hahú, nia precisa internaliza nia an ba programa de cada ministério hodi nune'e quando nia mai tuur iha ita-nia oin hodi rona ita-nia lian, nia mós bele iha capacidade atu responde ba ita.

E, ha'u hanoin, Vice-Ministro dos Assuntos Parlamentares sei mai. Nia sei mai iha loron ida ne'ebé mós mai ona ho programa sira-ne'ebé nia acompanha ona saida mak Governo ne'e atu halo, nune'e nia bele iha informação ne'ebé di'ak ba ita hodi evita mós desvio sira-ne'ebé desnecessários, contestações desnecessárias, meramente para fazer voz.

Ita tem que ser iha netik eficiência ida ba uso do tempo ita-nian, selae ita mak hakilar malu nafatin tinan bailoro e Orgânica do Governo ka Lei Orgânica do Governo sei mai, ne'ebé mós agora daudauk sira discute e sei bele explica saida mak ko'alia kona-ba o que é a infraestrutura, um dos

pilares ne'ebé contempla iha Plano Estratégico de Desenvolvimento Nacional como terceiro pilar. E tanba ida-ne'e, se dehan iha Vice-Ministro para infraestruturas, é normal porque nia precisa duni. Tanba ida-ne'e ha'u husu atu ita com paciência, vamos andar do ritmo.

Obrigado.

Sr.^a **Presidente**: — Obrigada.

Tuirmai, Sr. Deputado Firmínio Taequi.

Sr. **Firmínio Taequi** (CNRT): — Obrigado ba oportunidade.

Bom dia ba ita hotu.

Ba dahuluk, aprecia no louva tebes ba povo Atoni no povo Timor-Leste tomak ne'ebé deposita ona confiança mai iha Partido CNRT.

Iha biban ida-ne'e ha'u só secunda de'it declaração Deputado Natalino nian. Loos duni, acontece durante ne'e, iha Oe-Cusse, iha recrutamento APS. APS ne'e dehan Ami Pronto Serbisu. Sira atu serviço saida? Iha fatin ne'ebé? Recrutamento ne'e la tuir lei tanba halo iha tempo campanha, no ha'u husu ba IX Governo atubele halo investigação. E, durante ne'e *tenderização* ne'e la'o nafatin, maibé projeto barak abandonado hela.

Ohin ha'u rona Deputado balu halo intervenção barak kona-ba contrato, e, iha biban ida-ne'e mós ha'u hakarak informa ba ita hotu katak iha tinan kotuk liubá ha'u mós vítima ida. Ho Presidente Lugu, ha'u mós hetan contrato ba fulan neen, maibé depois de Presidente Autoridade foun bá, exonera tiha, fulan rua de'it exonera tiha ha'u, afinal contrato ne'e fulan neen, ne'ebe ita lalika preocupa ho atu hapára contrato. Ema atu recruta ne'e tuir necessidade ne'ebé iha.

Obrigado ba oportunidade ida-ne'e.

Sr.^a **Presidente**: — Tuirmai, Sr.^a Deputada Veneranda Lemos.

Sr.^a **Veneranda E. M. Lemos Martins** (CNRT): — Obrigada, Sr.^a Presidente, ba oportunidade.

Dadeer di'ak ba Ita-Boot no componente da Mesa, carros colegas Deputados e Deputadas, mídia e povo doben rona-na'in.

Ha'u-nia intervenção foca liu ba controlo. Husu atu Governo IX ida-ne'e atu tau mós controlo ba preço sasán sira-ne'ebé horas ne'e daudauk sa'e demasiado. Ha'u fó exemplo ki'ik ida mak kona-ba gás quilo sia, ne'e tinan tida sa'e dala rua kedas e agora daudauk nia preço to'o ona 40 dólares husi 20 no 25 dólares.

Tuirfali mak foos, mós hanesan, preço sa'e maka'as loos, no mós ai-han sira seluk.

Iha campanha nia laran, iha partido balu ne'ebé ba halo promessa dehan katak «Imi hili ami, ami hatún preço», mas afinal das contas partido sira-ne'e mak iha hela Governo nia laran hodi hasa'e preço.

Segundo, ko'alia kona-ba ambiente, ha'u secunda kedas intervenção ne'ebé Deputado Cedelízia foin hato'o kona-ba lixo sira-ne'ebé namkari iha ita-nia cidade. Ha'u husu nafatin, ha'u husu tebetebes ba Sr.^a Presidente Autoridade Díli atubele mobiliza equipa atu tau atenção, la'ós tau atenção, maibé halo controlo ida atu foti fo'er sira iha lixo fatin iha Díli laran tanba iha parte Bairro Pite ninia lixo bou hanesan tiha foho oan.

Ita ko'alia kona-ba lixo ne'e la'ós foin agora mak ita atu ko'alia, ita ko'alia lixo ne'e tinan hirak nia laran, hotu-hotu ko'alia lixo, lixo, lixo, lixo iha fatin hotu-hotu, maibé Díli continua fo'er, e udan quando boot, ita preocupa tebetebes tanba fo'er sira-ne'ebé la foti e la soe iha nia fatin, halo bee sa'e e sé mak terus liu, maluk sira ka povo ne'ebé hela besik iha mota ninin sira.

Terceiro, tanba hatene katak iha-ne'e iha mós técnico sira husi ministérios relevantes nian, ha'u hakarak atu husu nafatin atu técnico sira aponta halo didi'ak questões ne'ebé ha'u foti kona-ba Governo Dauluk ho serviço ida Cesta Básica nian, CLN (Centro de Logística Nacional) seidauk selu ema. Coitado! Tinan hirak nia laran, parece que tinan rua ka tinan tolu ona, ema na'in-hira oan ne'e hakilar beibeik ba 10 dólares cada ema ida. Desculpa! Osan ne'e iha ka la iha? Tanba ne'e mak ha'u husu ba técnico sira, favor ida hakerek atu nune'e Governo IX bele tau atenção ka tau netik orçamento hodi selu ema sira-ne'e. Ha'u ko'alia ida-ne'e ha'u atu tanis, tan ha'u triste! Ema sira serviço, sira bá hi'it sasán sai husi carreta para bá tau iha *gudang* laran, hafoin foti sai filafali husi armazém atu halo distribuição, 10USD cada ema ida durante semana rua, Governo la bele selu? Triste tebetebes! Agora mak ita foin mai hakfodak, ita dehan: «Ministério ida-ne'e atu hasai ema, Ministério ne'ebá hasai ema!». Be ami uluk hakilar, Ita-Boot sira exonera, exonera, exonera ne'e, ne'e halo nu'usá? Ne'ebe, ita dehan política ne'e ida-idak nian, atu haree ba questão contrato, sei tau atenção. Ne'ebe, ha'u secunda mós Presidente Bancada PD, Deputado António ninian hatete katak «Calma uitoan, sasán sira-ne'e hotu sei mai, lalika ansi!».

Obrigada.

Sr.^a **Presidente**: — Tuirmai, Sr. Deputado António Calau.

Sr. **António Moniz Calau** (FRETILIN): — Obrigado ba oportunidade.

Respeito ba Presidente Parlamento Nacional, composição Mesa, distinto e distinta Deputado sira hotu, mídia, povo maubere no buibere, rona-na'in sira iha-ne'ebé de'it imi assiste ami-nia Plenária ida-ne'e. Bom dia e saudações combativas.

Primeiro, hakarak secunda Deputado Natalino dos Santos nia preocupação kona-ba recrutamento no mal gastos iha RAEOA (Região Administrativa Especial de Oe-Cusse Ambeno), ami Bancada Oposição FRETILIN, la'ós ba RAEOA de'it, mas ami exige ida-ne'e ba VIII Governo Constitucional no membro sira hotu ne'ebé comete irregularidade e contra lei, la executa sasán loloos tuir lei, e mal gasto orçamento povo nian, husu atu halo investigação e aceita bele loke mós comissão atu halo fiscalização. E husu ba membro Governo sira-ne'ebé tutela, e sé de'it mak tutela, atu labele halai sai husi Timor-Leste.

Segundo, hanesan representante povo, liuliu Município de Díli, antes de IX Governo Constitucional atu lori Programa mai iha Uma-Fukun ida-ne'e, ha'u hakarak acrescenta proposta katak Município de Díli sofre tinan 20 resin ba bee moos. Bele mós iha curto prazo, 120 dias ne'e, considera proposta ida-ne'e hanesan prioridade atu responde ba povo ne'ebé hela iha Município Díli nia situação.

Ha'u bele temi iha-ne'e área sira-ne'ebé durante ne'e hetan sofrimento ba bee moos durante tinan naruk: ida Tasi-Tolu, Manleuna, Ailok-Laran, Fatumeta, Tuana-Laran, Taibesi, Lahane, Becusi e Bedois. Ha'u fó exemplo ida: iha Posto Cristo Rei, iha aldeia rua, Ailele-Hun ho Ai-Lok, fulan ida sira sosa bee moos dala haat hodi sustenta sira-nia necessidades, tanba ne'e, dala ida tan, ha'u husu ba Presidente, composição Mesa e bancadas Governo nian atu considera ba proposta ida-ne'e atu nune'e ita bele resolve situação bee moos iha Díli laran.

Ha'u hanoin, ida-ne'e de'it mak ha'u hato'o, karik liafuan ruma la kona-ba distinto e distinta Deputada sira-nia laran, ha'u husu desculpa.

Obrigado.

Sr.^a **Presidente**: — *No worries*, Sr. Deputado António Calau.

Tuirmai, ikusliu, Sr. Deputado Óscar Lima.

Sr. **Óscar Lima** (FRETILIN): — Obrigado, Sr.^a Presidente.

Sr.^a Presidente, Excelências Membros da Mesa, colegas distintas e distintos Deputados mak ha'u respeita, ha'u hakarak hatete de'it katak ha'u secunda de'it buat ne'ebé ohin ha'u-nia colega Lúdia hato'o tiha ona, é preciso ita haree lisuk. Ha'u la hatene se ita iha lei, ita-nia nação ida-ne'e lei ba preço sira-ne'e iha ka lae. Se bele, ita bele tau preço, di'ak liu para ema bele controla, hanesan ema ne'e bele hatene, ema nia osan ne'ebé fó ba ne'e hela troco ne'e hira nia bele hetan filafali, porque iha maluk negociante barak, sira halo tiha buat ne'e, quer dizer troco ne'e hela 10 cêntimos, nia la fó 10 cêntimos, nia fó rebuçado ida de'it, por exemplo. Mas 10 cêntimos kala vezes 100 ne'e barak ona, ne'ebe, ita hanoin, ita tem que haree mós kona-ba ida-ne'e.

Segundo, ha'u hakarak hatete mós katak ita iha Díli laran, principalmente Díli laran, ha'u husu, se bele karik Sr.^a Presidente hato'o to'ok ba Membros do Governo hodi haree, hodi controla, tanba problema ne'e ita-nia maluk sira-ne'ebé mai, ha'u lakohi temi naran, sira fa'an sasán ne'e até to'o iha *trotuar* nia laran. Quando to'o tempo ida sira taka tiha *trotuar*, ema la'o mós la di'ak, iha passeio, por exemplo, passeio! Ne'ebe, ha'u hanoin, se bele ida-ne'e ponto ida que Ita-Boot sira sei bele haree.

E ha'u hakarak informa de'it katak ami-nian husi Comissão E, kona-ba infraestruturas, ami ko'alia ona e depois ha'u-nia Presidente, ha'u hanoin, sei bele hato'o detalhadamente. Maibé, ami hanoin, ami-nia equipa, ha'u fó parabéns ba ami-nia equipa porque ami-nia equipa, equipa ida que serbisu fora de normal, amigável tebetebes, la iha partido iha laran, la iha oposição, la iha Governo iha laran. Ne'ebe, ha'u husu ba ha'u-nia colega ne'ebé chefe agora ne'e, Sr. Marcos Xavier, colega ne'e lidera di'ak tebetebes, e ami hotu-hotu iha *commitment* ida katak ami la iha oposição, la iha Governo iha ami-nia Comissão nia laran.

Obrigado ba Sr.^a Presidente.

Sr.^a **Presidente**: — Fantástico. Uluk GMPTL ami halo nune'e duni, mas depois vieram as consequências.

Bem, ha'u hanoin, ita remata *on time*, liu minuto rua de'it, mas ha'u atu hato'o ba Srs. Deputados, iha pedido balu que prevê iha ita-nia Regimento katak a Comissão bele bolu Governo iha debates ba áreas temáticas Ita-Boot sira-nian, Ne'ebe, ita-nia Regimento prevê, em vez de ita foti hotu iha-ne'e de'it, membro do Governo ne'ebé iha Assunto Parlamentar mak foti, maibé ita bele agenda quando Programa ho Orçamento Retificativo liu tiha, ita bele bolu se é muitíssimo importante.

Maibé, ha'u iha tan pedido ponto de ordem, Sr.^a Deputado «Deker», mas ha'u husu para fundamenta, está bem? Molok ha'u atu taka.

Sr. **Domingos Augusto «Deker»** (CNRT): — Obrigado ba oportunidade.

Ha'u-nia respeito ba Excelência Sr.^a Presidente ho composição Mesa, ba distinta ho distinto Deputado sira hotu.

Atu lembra de'it ba Sr.^a Presidente, ba futuro disciplina iha tempo para bele acumula ami hotu nia preocupação.

Obrigado.

Sr.^a **Presidente**: — Ha'u halo, disciplina duni, to'o ponto atu taka, ha'u taka! Ne'ebe, ha'u husu desculpa, maibé regras mak regula ita, la'ós tanba Fernanda, ne'e ka, Srs. Deputados? Ho respeito tomak ba Ita-Boot sira.

Molok atu taka, ha'u atu hato'o de'it, iha intervençãu balu, por exemplo, Sr. Deputado Natalino, loos duni, Comissão C bá to'o RAEOA, ami la bele fiscaliza tanba PA (Presidente da Autoridade) la fó informaçãu, ikusmai ami husu liga ho Haksolok, nia haruka de'it *amendment* ba contrato. Ha'u lakohi haree *amendment* ba contrato, ha'u husu números! Ne'ebe, ita iha desentendimento ida, ha'u espera katak Srs. Deputados ne'ebé toma conta, e afinal iha áreas infraestruturas bele um dia atu fiscaliza.

Tuirmai, atu responde mós ba Sr.^a Deputada Angelina Sarmento, ha'u fó hanoin de'it, iha pedido de urgência ba Orçamento Retificativo ne'ebé consta Secretária de Estado para Assuntos de Trabalhadores e Cidadão na Diáspora ficou sem efeito, ficou de molho, la *jadi* ida! Pedido ho urgência, orçamento ho urgente, mas depois funde tiha fali iha Vice-Ministro MNEC (Ministério dos Negócios Estrangeiros e Cooperação) nian. Ne'ebe, é normal, agora mós hein Governo ho ninia orgânica mai mak ita questiona malu.

Ida be hapára estrada, keta iha razão ruma karik mak ita la hatene, ne'ebe, ha'u hanoin, ita bele questiona Governo.

E liga ho Cesta Básica, que é por último, ha'u atu hato'o de'it, Srs. Distintos Deputados, auditoria la'o hela, ne'ebe ita hein auditoria mak sei *screen* saida mak Câmara de Contas halo.

Hodi nune'e, ha'u agradece ba Ita-Boot sira-nia paciência, ita *break* 15 minutos a parir de agora e ita filafali mai hodi haree ba ita-nia matéria Período da Ordem do Dia.

Muitíssimo obrigado e bom *snack* para todos.

Sessão plenária ne'e suspende iha tuku 11 liu minuto 8 dadeer no retoma fali iha tuku 11 liu minuto 44 dadeer.

Sr.^a **Presidente:** — Distinto e distinta Deputada, halo favor hola fatin. Ha'u husu ba técnico sira, talvez iha Bancada CNRT la iha relógio be sira haluha tiha karik, ne'ebe talvez ida bele bá bolu hela. *Maklum*, foin mak hahú be talvez relógio atrasado, ne'ebe ha'u haree to'ok.

Sr. Deputado Albino, ha'u husu desculpa, ha'u bolu fali Ita-Boot Deputado Abílio ne'e mak ba ha'u estranho uitoan, naran ne'e la iha. Maibé ha'u husu desculpa, técnico sira hakerek sala, ohin. Desculpa!

Srs. Deputados, tanba quórum funcionamento iha ona, tuirmai ita bá agenda ne'ebé ko'alia liga ho discussão e votação da Primeira Alteração à Deliberação n.º 3 /2023, de 5 de julho – Constituição das Comissões Especializadas Permanentes .

Ha'u espera katak ne'e a última alteração que halo para ita bele hein Programa do Governo.

Hodi nune'e, ha'u fó tempo ba Sr.^a Secretária atu lê.

Sr.^a **Vice-Secretária da Mesa** (Maria Teresa da Silva Gusmão): — Obrigada, Sr.^a Presidente.

«Deliberação do Parlamento Nacional n.º 5/VI/1.^a de 2023 – Aprova a Primeira Alteração à Deliberação do Parlamento Nacional n.º 3/2023, de 5 de julho, sobre a Constituição das Comissões Especializadas Permanentes.

Através da Deliberação do Parlamento Nacional n.º 3/2023 de 5 de julho, o Parlamento Nacional constitui as comissões especializadas permanentes para a VI Legislatura, determinando o número de comissões, a respetiva designação e competências, bem como o número de Deputados de cada comissão e a sua distribuição pelas diferentes bancadas parlamentares.

De modo a adequar a composição das comissões ao funcionamento mais eficiente do Parlamento Nacional, e considerando as suas competências constitucionais, impõe-se alterar a composição das comissões, aumentando o número de membros da Comissão de Assuntos Constitucionais.

Assim, o Parlamento Nacional delibera, nos termos do n.º 1 do artigo 27.º e do n.º 1 do artigo 30.º do Regimento do Parlamento Nacional, o seguinte:

O n.º 1 do Anexo II, da Deliberação do Parlamento Nacional n.º 3/2023, de 5 de julho, passa a ter a seguinte redação.

Comissão A: Comissão de Assuntos Constitucionais e Justiça – 9 membros

Comissão B: Comissão de Negócios Estrangeiros, Defesa e Segurança – 11 membros

Comissão C: Comissão de Finanças Públicas – 9 membros

Comissão D: Comissão de Economia e Desenvolvimento – 11 membros

Comissão E: Comissão de Infraestruturas – 9 membros

Comissão F: Comissão de Saúde, Segurança Social e Igualdade de Género – 9 membros

Comissão G: Comissão de Educação, Juventude, Cultura e Cidadania – 6 membros.

Anexo II

Número de Deputados de cada comissão e respetiva distribuição pelas bancadas parlamentares

Comissão A – Comissão de Assuntos Constitucionais e Justiça, 9 membros: CNRT 4 membros, FRETILIN 3 membros, PD 1 membro, KHUNTO 1 membro.

Comissão B – Comissão de Negócios Estrangeiros, Defesa e Segurança, 11 membros: CNRT 5 membros, FRETILIN 3 membros, PD 1 membro, KHUNTO 1 membro, PLP 1 membro.

Comissão C – Comissão de Finanças Públicas, 9 membros, composto por: CNRT 4 membros, FRETILIN 3 membros, PD 1 membro, PLP 1 membro.

Comissão D – Comissão de Economia e Desenvolvimento, 11 membros, composto por: CNRT 5 membros, FRETILIN 3 membros, PD 1 membro, KHUNTO 1 membro, PLP 1 membro.

Comissão E – Comissão de Infraestruturas, 9 membros, composto por: CNRT 5 membros, FRETILIN 3 membros, KHUNTO 1 membro.

Comissão F – Comissão de Saúde, Segurança Social e Igualdade de Género, 9 membros, composto por: CNRT 4 membros, FRETILIN 2 membros, PD 1 membro, KHUNTO 1 membro, PLP 1 membro.

Comissão G – Comissão de Educação, Juventude, Cultura e Cidadania, 6 membros, composto por: CNRT 3 membros, FRETILIN 2 membros, PD 1 membro.».

Obrigada, Sr.^a Presidente.

Sr.^a **Presidente**: — Srs. Deputados, ha'u hanoin, ita lembra katak ita aprova tiha ona, iha alteração iha Comissão A ho Comissão G, ne'ebe...

Mas iha pedido de intervenção, Sr. Deputado Joaquim dos Santos.

Sr. **Joaquim dos Santos** (FRETILIN): — Obrigado, Sr.^a Presidente.

Ha'u invoca Regimento, artigo 57.º, husu esclarecimento ba Mesa no ba Deputado proponente. Iha ita-nia decisão uluk, ha'u sei lembra, Presidente Mesa husu ba Comissão, Sr. Deputado António Verdial atu decide opção rua ne'e ida, ou nia hela iha Comissão G ou nia hela iha Comissão A. E, Sr. Deputado ho lian maka'as, ema hotu rona, dehan katak nia bá iha Comissão A, la iha ema ida mak contesta. Hanesan ne'e mós iha CNRT, tanba iha Comissão A ne'e aumenta tan número ida, iha momento ne'e mós CNRT la foti lia hasoru problema ida-ne'e, de repente ohin mai ita altera decisão ne'e. Ne'ebe, ha'u precisa esclarecimento, qual é o fundamento? Razão principal ne'e saida?

Obrigado.

Sr.^a **Presidente**: — Obrigada ba chamada de atenção, maibé, Sr. Deputado, iha correspondências ne'ebé to'o iha ha'u-nia mesa, ne'ebé subscreve husi Srs. Deputados das bancadas que alteraram. Claro katak ita atu muda bá muda mai, CNRT tem que halai tuir. Ne'ebe, ami la bele hato'o ami-nia objeção ba vontade de cada bancada para fazer parte da comissão que quiser, maibé labele repete. Iha correspondência, la'ós ami foti tau de'it iha-ne'e! Hanesan proponente ha'u hato'o ba ida-ne'e.

E sei iha Sr. Deputado Duarte Nunes atu halo intervenção. Halo favor.

Sr. **Duarte Nunes** (CNRT): — Desculpa, ha'u retira. Ha'u haree resposta ne'ebé Presidente da Mesa fó, ida-ne'e mak ha'u hakarak hatete.

Obrigado.

Sr.^a **Presidente**: — Obrigado, Sr. Presidente da Bancada do CNRT.

Ainda tem mais alguém que quer fazer? Se esgotou porque la atera buat barak.

Ponto de ordem, Sr. Deputado Aniceto Guterres.

Sr. **Aniceto Longinhos Guterres Lopes** (FRETILIN): — Obrigado, Sr.^a Presidente.

Distintos Deputados, ha'u só lamenta de'it, comissão ida número ne'e reduzido loos, seis membros de'it e tutela ba área ne'ebé importante, Educação, Juventude e Cultura. Ha'u hato'o de'it lamentações, Sr.^a Presidente. Se ha'u exige para altera, ne'e orsida sei altera hotu husi rohan ba rohan fali.

Obrigado.

Sr.^a **Presidente**: — Ha'u agradece, Sr. Presidente Aniceto, maibé ne'e vontade das bancadas, sira fó liu importância ba fatin seluk, halo nu'usá mak ita atu obriga? Ne'e a pedido. Ne'ebe, ha'u hanoin, bancada ida-idak iha nia responsabilidade tanba ita la bele repete ho razões ne'ebé ita hato'o tiha ona, e, ida-ne'e mak decisão de cada bancada, e ha'u respeita tebetebes ba vontade das bancadas.

Se ita la iha tan intervenção, vamos à votação, Srs. Deputados. Ha'u husu para prepara.

Sé mak vota a favor, contra ho abstenção?

Se bele, tau hanesan ne'e para husi ne'e ami bele haree!

Sr.^a Presidente husu atu Deputado sira hatudu cartão de voto ho loloos, nune'e bele identifica voto sira.

Sr. Deputado Oscar Lima...

Ok, muitíssimo obrigado por unanimidade.

Falta um, não é? A Deputada Maria Angélica também não está. Falta um, tanba a favor 64, contra 0, e abstenção 0. Está certo?

Hato'o ona ba votação, hetan aprovação ho unanimidade husi Deputado presente hamutuk 64.

Ok, muitíssimo obrigado.

Ha'u hanoin, ho decisão ida-ne'e comissões especializadas permanentes estão prontas para trabalhar. Mãos à obra!

Ida-ne'e mak ha'u agradece tebes e parabéns ba ita hotu ho votação por unanimidade, 64 a favor, 0 contra e 0 abstenções.

Hodi nune'e ha'u agradece tebes Ita-Boot sira hotu nia paciência e ita termina ita-nia sessão ohin dadeer nian, muito bom dia, bom almoço.

E ida-idak ba haree, tanba ha'u rona katak balu atu halo fiscalização iha Díli, halo favor, desde que não tenha custos, tanba ami tem que haree resto do dinheiro ne'ebé ita husik para ita la'o to'o ohin.

Pediu o ponto de ordem, Sr. Deputado?

Sim, faz a favor.

Sr. Duarte Nunes (CNRT): — Obrigado.

Ha'u fó-hanoin ba colega sira husi Comissão A, lokraik buat ida la iha, ha'u hanoin, ita aproveita tiha halo eleição ba mesa. Falta uma hora, ne'e se ita hotu concorda. Tanba ha'u mak sei dirige mesa be ha'u fó hanoin de'it.

Sr.ª Presidente: — Sr. Deputado António Verdial.

Sr. António Verdial de Sousa (KHUNTO):— Obrigado, Sr.ª Presidente.

Ha'u hanoin, colega sira husi Comissão A, se bele ita realiza agora kedas.

Obrigado.

Sr.ª Presidente: — Ha'u agradece Ita-Boot nia intervenção, maibé Srs. Deputados, ita foin han *snack*, ainda temos tempo até 1h00, ha'u hanoin, bele hala'o serviço ne'e.

Bom trabalho e até amanhã.

Horas hatudu tuku 11 liu minuto 59 dadeer.